



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim

tiryimiyim@aolima

tir yimiyim TAPAK 10

Kashmir nungertemi parnok sasa telemtetba agitsü: Imran Khan

Tokyo Olympics: Mirabai-i India atema mezüng medal angu



VOL. XVIII NO. 281 (ADOK 281) DIMAPUR AMUNGNÜ (SUNDAY) CHITENI (JULY) 25, 2021 ₹ 5.00

NSCN-IM lennir Th. Muivah mozü kidang anepalur



(CIHSR)-i anir ao. Taonung 6:30 ako meta pa emergency room nung anioka anepalur.

Ajisüaka, taonung 9:30 ako meta Dr. Sedevi Angami-i "CISHR emergency HOD Dr. Tsarangpi A Sangtam lenisüba kübok Th. Muivah anepaludar aser pa temang tajungba kümogo" ta metetdaksü.

"Th. Muivah indang oxygen level 96% kümogo" ta paisa ashi.

Dimapur nung Core Committee on Naga Political Issue den senden amenba sülen anogo ka lir Brihostibarnü Th Muivah dak COVID-19 aliba putet. Pa Referral Hospital nung anepaludar aser temang junga dang lir ta NSCN-IM ketdangsür katia metetdaksüogo.

CISHR nung NSCN-IM lennir Th. Muivah anioka anepaluba atema police ketdangsürtem den IRB jawan tem tesem tonga arur nükdar.

Dimapur, July 24, 2021 (TYO): NSCN-IM General Secretary Th Muivah dak COVID-19 putetba sülen anogo ana lir sülen pa temang mejungi akümba agi Honibar nikongdang Christian institute of Health sciences and research (CIHSR) nung anioka anepaludar. Osang angazükba agi Th. Muivah temang kanga mejungi aküm aser oxygen level kanga ajema akümba agi tanü nikongdang Referral Hospital

District 5 nung COVID positivity rate teimba akümer

Dimapur, July 24, 2021 (TYO): Nagaland nung district punggu nung positivity rate kanga teimba kümogo ta health department-i metetdaksü.

District punggu Dimapur, Phek, Wokha, Longleng aser Peren lir.

Taoba hopta ka tsünga Nagaland nung nisung 640 dak COVID-19 aliba putet aser nisung 18 asü. Iba ajanga taoba hopta ana tsünga sample positivity rate 8% liasü ta health department-isa ashi.

Taoba hopta 5 tsünga

COVID-19 hospital tem nung aser talisa Dimapur o Kohima nung nisungtem aniokba ajema maküm. Lokti nung nisung aika dak COVID-19 lir sernung meputet alitsü ta shisabulur ta department-isa ashi.

Nagaland nung COVID-19 puteta alir asübatem reprangdangra, diabetes aser hypertension alir teimba lir.

Taoba hopta ka tsünga COVID-19 vaccine indang dose 69,599 agütsüogo aser ibaji züngsema dose lakh 7.29 tashi agütsüogo.



July 24, 2021 nü Dimapur kübok Chumukedima nung World Wide Freedom Rally Part 3 agiba angur. Iba lungkak aitiba sentong ya compulsory vaccination asüba anema ayonga agi aser district administration-ibo temelaba magütsü saka sayutsüngirtem aser pastor temi anir nisungtemi kanga longsoa shilem agi aser sarasadema tembang. (Dimapur, July 24)

COVID-19 Nagaland: 124 dak putet, 59 taneptsü angu & 1 asü

Kohima, July 24, 2021 (TYO): Honibarnü Nagaland nung nisung 124 dak COVID-19 putetba züngsema nisung ajak agi 27,240 kümogo.

"Tanü nisung 124 dak COVID-19 putet. Parnokji Dimapur nung 54, Kohima nung 37, Mokochung nung 11, Peren nung 10, Mon nung 4, Longleng nung 3, Tuensang nung 2 aser Kiphire, Wokha o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 agi shiranger nisung 59 tashi taneptsü angu. Parnokji Dimapur nung 19, Tuensang nung 11, Kohima nung

10, Mokochung nung 9, Phek nung 5, Zunheboto nung 4 aser Peren nung 1 lir. Parnok züngsema taneptsü angur 24,630 kümogo" ta paisa ashi.

Nagaland nung COVID-19 nungi taneptsü angur 90.41% lir aser tang nisung 1,312 anepaludar, ta Dr Kikon-isa metetdaksü.

Honibarnü Dimapur nung COVID-19 puteta alir nisung ka asüba züngsema tasür ajak agi 538 kümogo saka nisung 14 bo tanga tashidak ajanga asü, ta paisa ashi.

"Tang tashi nung COVID-19 alitsü akok ta temolung melemi bilemba sample 2,54,260 tendangogo. RT-PCR ajanga 1,01,733, TrueNat ajanga 66,511 aser

Rapid Antigen Test ajanga 86,016 tendang" ta Dr Kikon-isa ashi.

"Hokolbar tashi nung nisung 5,92,869 nem COVID-19 vaccine indang dose 7,29,882 agütsüogo" ta State Immunization Officer, Dr Ritu Thurr-i metetdaksü.

Vaccine agirtemji frontline workers 60,678, healthcare workers 15,952, arishi küm 45 ser temapur 1,78,981 aser arishi küm 18 nungi 44 tsünga alir 3,36,258 lir, ta paisa ashi.

"Vaccine agirtem rongnungi nisung 1,37,013-i dose anaprong agiogo. Parnokji frontline workers 37,697, healthcare workers 12,130, arishi küm 45 ser temapur 86,916 aser arishi küm 18 nungi 44 tsünga alir 270 lir" ta Dr Thurr-isa ashi.

Home Minister Amit Shah-i Meghalaya nung mapatong aika lapoktsü

Shillong, July 24, 2021 (Agencies): Union Home Minister Amit Shah-i Honibarnü Shillong nung inter-state bus terminus ka dena mapatong aika lapoktsüogo.

"Tanü onoki Mawiong, East Khasi Hills nung interstate bus terminal lapoktsüogo. Iba ajanga northeast nung road connectivity tajungba kümdaktsütsü aser northeast rongsenketzüng maparen inyakkak tongti ka kümdaktsütsü" ta Shah-i ashi.

"2023-24 tashi nung Northeast state 8 yimtiba ajak railway aser airways ajanga sendakteptsü. State yimtiba karbo airways aser railways sendaktepa lir" ta paisa metetdaksü.

Amit Shah-i interstate bus terminal lapoktsüdag Meghalaya Chief Minister Conrad Sangma aser

Union Minister G Kishan Reddy na liasü.

Union Minister Shah-i anogo ana atema Shillong nung amongtsü arua lir.

"Ni yangi aruba atema pelar. North East region atema connectivity ya kanga tongtipang" ta Amit Shah-isa metetdaksü.

"2014 küm BJP sorkar akümba sülen onoki northeast region nung connectivity tajungba agütsütsü nangzüka liasü. Rail aser air connectivity dak alia gari lenmangtem agi junga sendakteptsü. Gari lenmangtem ajanga senzusenbongba nung dang masü saka rongsenketzüng renlokba nunga teyari agütsür" ta Shah-isa ashi.

Honibarnü Home Minister

Amit Shah-isa Umsawli nung cryogenic oxygen plant, Wahshari nung afforestation project aser Khliehshnong nung Greater Sohra Water Supply Scheme lapoktsü. Paisa Shillong nung Assam Rifles indang headquarters semdang.

Union Home Minister-isa Umiam, Meghalaya nung North Eastern Space Application Centre (NESAC) reprangshitsü atema senden ka ayonga amen.

NESAC meyipa reprangshiba senden nung Northeast state 8 nungi Chief Minister tem den, Minister G. Kishan Reddy, Union Science and Technology and Space Minister Jitendra Singh, aser Indian Space Research Organisation Chairman K. Sivan nungertem aden.

Manipur sorkari Mirabai Chanu nem Rs 1 crore agütsütsü

Imphal, July 24, 2021 (Agencies): Tokyo Olympics 2020 nung Saikhom Mirabai Chanu-i silver medal anguba atema state sorkari la nem Rs 1 crore senpet agütsütsü ta Honibarnü Manipur chief minister N Biren Singh-i metetdaksü.

Tanü chief minister Biren-i Mirabai den video ajanga jembidang iba osang sangoktsü. Tokyo Olympics 2020 nung weightlifter Mirabai Chanu-i India atema mezüngbuba Olympic medal angu. Lai women's 49kg category nung silver medal angu.

Iba telemsa nung China tsür Hou Zhihui-i gold medal angu.

Arishi küm 26 tain Mirabai Chanu ya Manipur nungi lir aser lai final nung 117 kg ajungkettsü

merang saka makok.

Mirabai Chanu-i 115kg ajungketba ajanga Olympic record tasen ka yanglutetogo.

"Tokyo Olympics nung shilem agitsü atema Manipur nungi saisaponger nisung 5 shia nem Rs 25 lakh agütsütsü aser parnoki medal ngura ano senpet talila agütsütsü" ta Manipur chief minister Biren-i June 29, 2021 nü sangdonga liasü.

"Gold medal angur nem Rs 1.20 crore, silver medal angur nem Rs 1 crore aser bronze medal angur Rs 75 lakh agütsütsü" ta Manipur CM-i metetdaksü.

Saikhom Mirabai Chanu (weightlifting) dak alia Manipur nungi P Shushila Chanu (hockey), Nilakanta Sharma (hockey),

Shushila Likmabam (judo) aser MC Mary Kom (boxing) nunger Tokyo Olympics 2020 nung shilem agitsü atema shima lir.

Küm 21 tejakdang weightlifting nung India tsür Karnam Malleswari-i Sydney Games nung bronze anguba sülen Mirabai-i weightlifting nung India atema Olympic medal tanabuba ngutetogo.

"Ni Olympic medal kabosa angutsü ta alizüng ayuba tanü atalokogo. Ni Rio Olympics nunga kanga merangdang saka takok mengutet. Iba anogo ni Tokyo nung medal ngua sayutsü ta bilem" ta Sports Authority of India (SAI)-i online ajanga osangbener senden ayonga jembidang Mirabai Chanu-i ashi.

Temang nung 'sugar level' tali alirtemia Covid-19 vaccine agitettsü

New Delhi, July 24, 2021 (Agencies): Temang nung blood sugar level kanga aika alirtemia Covid-19 indang vaccine agitsü akok kechiyong vaccine aser sugar level tsünga tesentaktep kecha mali ta AIIMS Bhopal director Dr Sarman Singh-i ashi.

"Nisungtemi blood sugar levels azüoka yunür saka Covid-19 vaccine ajanga nisung ka indang

temang nung blood sugar level nung timtem magütsür" ta Dr Singh-isa ashi.

Covid-19 wara tanabuba adokba mapang doctor temi high blood sugar alirtem dak mucormycosis menatsü akok ta kümdangtsü osangtem metetdakja liasü.

"Vaccine ya sugar level den tesentaktep mali. Sugar level kanga aika süra mapang talangka ajem

atudak ashitsü (pain) akok" ta Dr Singh-isa ashi.

Ano, high blood sugar alirtemi vaccination site nungi tanga tashidak menatsü akok, ta paisa shisem.

Taküm March ita Indian Council of Medical Research-i diabetes alirtemi Covid-19 masü saka tanga tashidak menatsü lendong lir ta metetdakja liasü.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



CHSS nung toppeer tem nem tetushi agütsü



Dimapur, Chiteni/July 24 (TYO): Christian Higher Secondary, Dimapur nungi HSLC aser HSSLC 2021 Topper tem atema school administration-i July 24 nü tetushi agütsüba sentong ya ayongzüka katsüogo. Iba sentong ya Covenant Hall nung agi, kong toppeer tem den parnok tsürapurtem, administrative tekolaktem, tesayurtem aser class 12 kaketshirtem dena

liasi. Topper tem rongnung HSLC: Zahid Ahmed Laskar, Tabasum Talukdar. HSSLC: Rasma Begum, Soni Gupta, Z.Hushili Swu, Chubatola, Nupur Jain, Medhamahima Choudhury nung densema lir. Takok angurtem nem tetushi agütsüba sentong ya Vice Principal Patricia Zhimomi lenisüba nung agi aser tesayur Renbeni aser Chaplain Jolly

nati sarasdema liasi. Tenüngsang agütsüba ojembiba mapang Principal-i, School Managing Board chairman Rev. Lamkhotong T Singson indang osang lemsatepba den kaketshirtem dang ajemalutsü, maneni meranga inyaksü aser parnok aolen ajaki school tesangwa bener aotsü ajungshi. Topper temia parnok takok tajung anguba tasa lemsatepa liasi.

Assam Rifles-i sentong balala ayongzüka agi



Dimapur, Chiteni/July 24 (TYO): HQ IGAR (North) kübok Assam Rifles Kohima Battalion-i, July 23 nü Kezoma yimtsüng nung Village Chairman, Youth Association züngsemtem aser tanga Village Council züngsemtem den sensaksem sentong ka ayongzüka agiogo. Yimtsüng nung ketdangsürtem den tongtepratepa Covid vaccine agiba jenjang angatetsü aser yimdaklirtem nungdaktem jangjatsü atema AR-i iba sentong ayongzüka agia liasi.

emergency response team-i mapang shidak nung jenjang tapet agia gari anisang kümzüik aser Dimapur-Zubza Railway Line Project atema amshia aliba dumper gari nung mi adoker aliba temseptsü. Assam Rifles-i osang angazükli jenjang tapet agiba atema gari kibur aser senzisenpongertemi parnok dang kanga pelaba lemsatepa liasi. Maneni Assam Rifles Ghaspani Battalion-i, 'Educated Nagaland for Progressive Nagaland' omen nung ajemdaker July 24 nü Nihokhu aser Medziphema yimtsüng nung lecture cum sensaksem sentong ayongzüka agi.

Kasa mapang nung July 23 nüsa Dimapur District kübok Jharnapani anasa NH29 nung Dumper gari ka arongba osang angazükba sülen Assam Rifles, Ghaspani Battalion-i teyari agüja liasi. Ex Nihokhu AR post nungi

Sentong nung shilem agirtem rongnung kaketshir aser tsürapurtem densema liasi, shirnok jenjang tajungba ka asoshi kaket shisatsü maneni

bushilokyonga aotsü atema ajungmesoa liasi. Local lanur aser tsürapurtem dang kaketshisatsü koda tongtibang iba indang tangazükba agütsüba atema yimdaklirtemi Assam Rifles dang kanga pelaba lemsatep.


July 24 nüsa Assam Rifles Jalukie Battalion-i, Peren jila nung Zeme Baptist children's home aser servant ministry children home nung aliba tanurtem atema saisapong sentong ka ayongzüka katsüogo.

Iba saisapong sentong ya tanurtem südosünema kazüdaktsütsüba atema dang masü saka sportsmanship ajungketsü aser saisapong nung sempet aketertem atema sabang lapoktsütsü nükjidong nung ayongzüik.

Saisapong nung shilem agirtem dang sports & games luyim nung lenmang sadema lapoka aliba indang, tanga asayaa aliba Tokyo Olympic games indang aser tang Olympic team nung densema aliba asayartem Indian Armed Forces-i anitetba indang metetdaksü. Asaya balala nung tanur 31-i shilem agia liasi.

Nagaland sorkar aser INRECO Studio na sendaktepogo

Dimapur, Chiteni/July 24 (TYO): July 24 nü Task Force for Music & Arts (TaFMA)-i achaayanga Nagaland sorkar aser Indian Record Mfg. (INRECO) (Hindusthan Records) na virtual kijaa kentenba tetoktepb 'Voice of TaFMA' atema longjemogo. INRECO ya India meyong mezüngbuba Music label lir. Iba tetoktepb nung English, Hindi & Nagamese oshi nung peisasa mejemba kentem tokteptsü.



INRECO ya gramophone Record Label ka lir, koba Nobel Laureate Rabindranath Tagore-i 1932 küm tenzüjka liasi. Iba company yagi Rabindranath Tagore indang ken mezüngbuba mangaoka liasi. Indian Record

Mfg. Co. Ltd.-i Punjabi, Bhojpuri, Marathi, Tamil aser Malayalam kenteneritem aika

indang ken mangaokja tenzüik. Parnoki ken mangaoktsüba kenteneritem rongnung Lata Mangeshkar, Asha Bhonsle, Pt.Mallikarjun Mansur, Pt. Kumar Gandarva, Ustad Amir Khan aser Manna Dey nung densema lir. Kasa mapang nung TaFMA-i 2019 küm nungi state nung aliba local artists tem ajungketsü atema maparen balala inyaka arudar.

TaFMA-i benjung aika nung shilem agidar aser AR Rahman indang KM Conservatory aser South East Asia nung subcontinent kübok tanga tesem nungi company aser nisung balala den longjemer inyaka arudar.

Naga Hoho-i asükhu lemsatep

Dimapur, Chiteni/July 24 (TYO): Naga Hoho tir H K Zhimomi-i sandong ka ajanga taoba Nagal Hoho tir Bendangmayang Jamir asüba osang angazükba mang ayimba lemsatepogo. Asür Bendangmayang ya Naga Hoho leniba tashi ka ama bilemteter aser pa lenisüba nung 2006 küm July ita 14 nungi 2008 tashi Naga Hoho inyaksangshiogo, ta paisa ashi.

nung Indo-Naga yimden yimsüsüba ken o ya Naga Hoho-i achaayanga sensaksema liasi, ta Zhimomi-i ashi.

Pa ya Naga Hoho asoshi tebuti ka, shibai Naga Hoho tir mapa abenba mapang kanga mulungsoa pei talsoli Mokokchung toktsür par kibong ajunga den Kohima nung arua amenoker inyak. Pa lenisüba

"Asür Bendangmayang ya kanga dang tongmelang aser Naga nunger atema nükla tejangja akaba nisung ka liasi, shibai Naga nunger atema bendanga agüja inyakogo," ta tiri ashi.

Naga Hoho-i asür Bendangmayang kinungtsü Tsukjemla Imchen aser chirnurtem den asükhu lemsateper aser asür tanüla teti tatem makadak anisingzükdakjang ta sarasdemtsür, ta kasa sandong ajanga H K Zhimomi-isa lemsatep.

SBI Tuensang-i HSLC Toppers ana nem tetushi agütsü



Kohima, Chiteni/July 24 (TYO): The State Bank of India (SBI) Tuensang-i July 23 nü Tuensang district nungi HSLC Exam-2021 topper ana nem tetushi agütsüba sentong ka ayongzüka katsüogo.

kaketshir asem nema tetushi agüja liasi.

District nungi topper ana ya St. John Hr Sec School, Tuensang nungi Thronglila Rengma (11th rank) aser Hanglenchila Y Chang (13th rank) na liasi. Tuensang Branch-i tena nem sempet balala agüja ajungmesoba den parnok takok asoshi tenüngsang tulu agüja liasi.

Sentong nung Chief manager SBI Tuensang, Mr. Lohuo Besii-i topper tem nem tenüngsang agütsüba den tarutsü nunga takok nung aotsü imlaja ataba lemsatep. Kaketshirtemisa parnok asoshi tetushi agütsüba sentong ayongzüka katsüba atema bank dang kanga pelaba lemsatepa liasi.

Bank-isa, Mathematics tesayur Roseline aser lai sayuba subject nung mark 100 ngutetba

Maneni bank-i kaketshir ana tsürapurtem den sensaksem tatsüka aka, shirnoki tetushi agütsüba sentong ayongzüjka parnok chirnur ajungmesoba atema kanga pelaba lemsatepa liasi.

Mizoram den arrtsü nung Assam police mungzüka lir

Guwahati, Chiteni/July 24 (Agencies): Assam aser Mizoram na tsüngda arrtsü nung mangatettep adoker aliba mapang, iba tesem nung aliba nüburtem nem tekümüzüka agütsütsü atema Assam tsütsülen police mongzüka lir.

kiojentem kümzüka ayutsü atema onok iba tesemi oa lir. Arrtsü kümzüka ayutsü atema onok dak tashi lir," ta Chandrakant-i ashi.

Assam police tem Khulicherra aser Dholakhal nung mungzüka lir, ta Cachar SP Nimbalkar Vaibhav Chandrakant-i ashi.

Iba tesem nung Muslim nunger aahyanger kar Mizoram nunger ali nung mapa inyaka liasi, ta ketdangsüri ashi.

"Police tem arrtsü nung mongzüka lir aser onoki tensa maneni asandangdar. Nüburtem tetsüba agi kidang nungi mayazükba ken o kecha mali aser onoki iba ken o jangjashiogo," ta pai ashi.

Paisa, parnok ya Assam nung alirtem lir kechiyong parnok tenüng Cachar voter list nung lir, ta ashi.

Khulicherra tesem ya Dholai Police station küboki aiter, ta ketdangsür tejentem aser Cachar SP-i ashi.

"Muslim nunger aahyanger kar iba tesem nung mapa inyaka liasi. Aahyangertem ya Eid benjung amungtsü atema khu bener meyipa arua liasi. Media kar nung kidanger state-i iba tesem nung alirtem amaktsü tsübuba agi pei ki toktsür ao ta osang prokshiba ya tai," ta SP Chandrakant-i ashi.

Assam Police aser Mizoram Police naprongla iba tesem nung mungzüka lir aser ibayongji nisung karbo iba tesem toktsürogo, saka Mizo police-i amokmerenba ajanga item nisungtem ainshiba masü.

Mizoram den Cachar aser Hailakandi districts arrtsü nung Assam police-i özüng alema ali atsünga arur alirtem mintoktsü atema maparen inyak tenzüka sülen arrtsü nung mangatettep adok.

Paisa, iba tesem nung aliba nüburtem nem tekümüzüka agütsütsü atema police temi takokba tashi inyakdar, ta ashi.

July 10 nü Assam sorkar nungi team kati arrtsü semdangba mapang parnok dak IED ka mereploktsü aser ano July 11 anepdanga züngia lia arrtsü adener bomb apokba ola angashia liasi.

"Assam nunger aser parnok

Journalist Wangkhem-i SC nung NSA anema ken o benoktsü



Manipur journalist Kishorchandra Wangkhem (File photo)

Guwahati, July 24, 2021 (Agencies): Hokolbarnü tepuokdak nungi chiokba Manipur journalist Kishorchandra Wangkhem-i Supreme Court nung National Security Act (NSA) agientsü atema ken o benoktsü osang metetdaksüogo.

Manipur High Court-i Hokolbarnü Wangkhem

shiooktsü atema tetuyuba agüja liasü. "Ni kü lawyer tem den jembitsü aser Supreme Court nung NSA anema ken o benoktsü atema asüngdangtetptsü" ta pai osangbener dang ashi.

Journalist Wangkhem ya political activist Erendro Leichongbam den külemi May

13 nü apu. Manipur BJP president S. Tikendra Singh COVID-19 ajanga asüba sülen tenati Facebook nung nashi scü aser nashi natzü ajanga COVID-19 nungi taneptsü mangutsü ta züluba atema tai tonglokja apu.

Supreme Court-i tetuyuba agütsüba sülen Leichongbam ya July 19 nü chiokogo.

Pa COVID-19 dak sendakba osang ka bushisüngdangba atema sorkari pa dak tenük yok ta Wangkhem-i ashi.

Kumbh Mela nungi nisung 200-250 shi aruba sülen Manipur nung COVID-19 kanga proskhi ta paisa metetdaksü.

"Ni iba onük bushisüngdangba ya sorkari metet aser iba jagi ochi mejembidaksütsü atema ni tepuokdak ayu. Iba sorkar yagi kü ola nembangtsütsü ta ni meteta dang liasü. Asenoki NSA anema mapa inyaksüla" ta Wangkhem-isa ashi.

Assam Congress president inyaksü atema Bhupen Borah shim

Guwahati, July 24, 2021 (Agencies): Honibarnü All India Congress Committee (AICC) president Sonia Gandhi-i Assam Pradesh Congress Committee (APCC) nung president inyaksü atema Bhupen Borah shimoho.

Bhupen Borah ya taoba Bihpuria MLA lir aser AICC general secretary teinyakdak lir. Pai Rajya Sabha MP, Ripun Bora nungi APCC president melenzüktsü.

Assam Assembly elections 2021 nung Congress-i takok tajung mengutetba aser Gohpur Assembly nungi tamakok anguba sülen Ripun



Bhupen Borah (File photo)

Bora-i Assam Congress president menden toktsü.

Ajisüaka, party High Command-i Ripun Bora dang PCC president maneni inyaka atatsü ashi.

AICC president-isa Assam

Pradesh Congress Committee nung working president tasen asem shimogo.

"AICC president-i taoba Jorhat MLA Rana Goswami, North Karimganj MLA Kamalakhya Dey Purkayastha aser Sarukhetri MLA Jakir Hussain Sikdar nunger APCC vice-presidents inyaksü shimogo" ta AICC general secretary & MP, KC Venugopal-i ashi.

AICC-i PCC president toktsür Ripun Bora-i mapa tajung inyakbatem atema tenüngsang agütsür ta KC Venugopal-isa metetdaksü.

Arunachal nung IIM Shillong indang satellite centre lapoktsü



Itanagar, July 24, 2021 (Agencies): Arunachal Pradesh nung IIM Shillong indang satellite centre ka lapoktsü atema Hokolbarnü Memorandum of Understanding (MoU) ka sign sütepogo.

State sorkar ketdangsrtem ajangzüktsü aser nungdakba policy tem yanglutsü atema IIM Shillong aser Arunachal Pradesh sorkar tsüngda tenangzüktep agiogo.

APJ Abdul Kalam Centre for Policy Research & Analysis den Memorandum of Understanding sign sütepogo" ta Arunachal Pradesh chief minister Pema Khandu-i metetdaksü.

Chief minister Pema Khandu lia Arunachal Pradesh chief secretary Naresh Kumar aser IIM Shillong nung director Prof DP Goyal nati MoU nung sign asü.

"Sorkar ketdangsubaren

atema capacity building ya kanga tongtipang aser Northeast nung IIM Shillong tajungtiba lir" ta chief minister Khandu-isa ashi.

October 15, 2016 nü Indian Institute of Management, Shillong, Ministry of Development of North Eastern Region (DoNER) aser North Eastern Council (NEC) tsüngda tenangzüktep agiba sülen Dr APJ Abdul Kalam Centre for Policy Research and Analysis lapok.

Office of the
AO KAKETSHIR TELONGJEM, KOHIMA
KOHIMA : NAGALAND - 797001
Regd. No. H/RS-126

TENÜNGSANG AGÜTSÜR

Tawa NBSE results 2021 nung tsünglanglen agüja aliba kaketshirtemi Top rank nung takok tajung anguba atema Union nem tenüng tajung bentsür aruba atema Ao Students' Union Kohima (ASUK)-i kanga dang nüma tanga aser pelaseta tenüngsang tulu agütsür.

1. Ms. Longtila Jamir D/o N. Chuba Jamir	~ Top- 10 (HSLC)
2. Ms. Sentienla Yaden D/o Temjenzulu Yaden	~ Top - 11 (HSLC)
3. Mr. Mongdikokba Walling S/o Lar-rutemjen	~ Top- 12 (HSLC)
4. Mr. Aotushi Imsong S/o Taliwapang Imsong	~ Top- 12(HSLC)
5. Ms. Wangshirenla D/o Dr. Imtir.vapang Aier	~ Top - 19(HSLC)

Union-isa HSLC aser HSSLC 2021 tatidangtem nung takok angur ajak nem tenüngsang agütsür aser tarutsü nunga takok ngudakjang ta moatsür.

Sd/-
Imodangba Imchen
President

Sd/-
Watisenla Walling
Assistant General Secretary

Assam CM Sarma aser minister Bora na social media nung lutsür



Guwahati, July 24, 2021 (Agencies): Guwahati yimti nung Boxer Lovlina Borgohian moatsütsü atema Assam chief minister Himanta Biswa Sarma aser state sports & youth welfare minister Bimal Bora na indang noksa tululu ayuba atema nisungtemi aitsür.

2021 Olympics nung Lovlina-i India tenüng nungi shilem agir aser taküm Tokyo Olympics nung Assam nungi la dang lir.

Lovlina nem tenüngsang

agütsüba indang billboard aika Guwahati nung yua lir aser billboard nung chief minister Himanta Biswa Sarma mesüra sports minister Bimal Bora indang noksatem keta lir. Ajisüaka, billboard ka nung danga boxer Lovlina indang noksa mali.

Chief minister Sarma aser sports minister Bora na indang noksa aliba billboard tem indang osang online nung prokshiba sülen social media amshir aikati tena aitsütsü tenzükogo.

Manipur Congress MLA shingaia party metoktsü: Dasa

Guwahati, July 24, 2021 (Agencies): Manipur nung Congress MLA 8 shi kati BJP nung adentsü ta jembiba mapang ka nung AICC lennir Bhakta Charan Das-ibo Manipur nung Congress MLA shingaia party toktsür mao ta metetdaksüogo.

Das ya tang Imphal nung arua lir aser pai Congress state unit nung mepetmesü aliba atema angatetteptsü atema jembishinür. MPCC president Govindas Konthoujam-i AICC president Sonia Gandhi nem resignation letter agütsüogo saka Konthoujam-i party metoktsü, ta Das-i ashi.

Anogo tenet tsüngda Manipur nung president tasen ka shimtsü ta Das-i Imphal nung osangbener dang ashi.

"Congress party nung ken o ajak angatetteper. Onoki March 2022 Assembly election nung takok angutsü atema renemer. Election nung takok angutsü atema Congress züngsem tajung ka president inyaksü atema shimtsü" ta paisa ashi.

MLA tejentem aser tanga lennirtemi party tashi itdaksütsü atema külemi inyakdar, ta Das-isa metetdaksü.

Brihostibarnü Manipur Chief Minister N Biren Singh-i Congress MLA 6-i yakta BJP nung adentsü ta shia liasü.

Supreme Court-i Parliamentary Secretary ama shimba party MLA 12 tashi anenjaka BJP-i aniba Ministry meloktsü, ta Biren-isa ashi.



TIR YIMYIM

YIMOBILEM (EDITORIAL)

DIMAPUR AMUNGNÜ, CHITENI (JULY) 25, 2021

Tsüngrem külemba mong

Joko tanü serbo taruba amongnūjibo Tsüngremmong asütsü. Asenok akhi tsürabur zonizüing (calendar) yabo aluyimbaren nungi tenzüker aser atemer asünungji, asen Ao kin asoshibo mezüing itaji Luchii (December) aser tesüba itaji Luroi (August) ita asütsü südi ta bilemer. Ibaji shitak sükdangtet nungbo, Aor itabo ita ka nung anogo 30 dak tali asütsü. Ajisüaka, tanübo alima den liromedema aotsü atema tangar ama asenoka Gregorian Calendar sülen anidaker, anungji asenok küm tasen January (Ainjeti) nungi tenzüker aser December (Luchii) nung atemer. Ashi, shitakba asenok Aor Zonizüing (calendar) agidi asübo, Luroi (August) ya tesüsaba ita lir, anungji Aor benjongbentsü küm piyong mongyonga aruba rongnung Tsüngremmong benjong ya tesüsaba küm tatem benjongmong lir. Atangji, Tsüngremmong ya Luchi ita nungi tenzüka Luro ita tashi, küm piyong, anü tzünglu mapang shitak nung yoka, yipru mopong aser shiruru tamajungtem nungi alu kümzüka tsüksüngsungsüsa moatsüba asoshi Tsüngrem nem tenüngsang agüja amongba among ka lir. Tsürabur mapanga ibai shi den chiyonga, yi jema yar tsüngsanga pelatepa amongba benjongmong ka dangbo masü saka anogo asemnü agia iba benjong amongdang, mezüing anogo nungbo kinunger ajak kidang monga alidang kidang tebuai arem nungi anempong süngo, tsüngpet tu (jangpetwa) bener adoka kima kishidong nung alenloka yur anemponga (meshiteta) among tenzüker. Aji oda, tananü nashi ak tepseta yartsüngsanga amongyonga, moatsümong ama masü, Tsüngremmong yabo kanga anemponga among. Tsüngremmong nung ki shia Tsüngremi semdang aser idangji anemponga melira merenshir ta tsüraburtemi amang. Atangji, küm piyong Tsüngremi lendong timtem ajak nungi kümzüka anir aru aser alu mapa ajak nung moatsü, ajisüaka aji tatem masü. Aji oda, alu nung mena aliba tsük jagi ki matong tashi kechi ataloktsüar memetet, anungji Tsüngrem teyari nungdakbaji asen tsüraburtemi angateta liasü. Iba amaji asen tsüraburtemi tamang liasü. Tanübo asenok iba tamang nung jagi talangka pilaogo. Iba tamang jenjangji asenoki metongtetba agi asenoki asen tsüraburtemi amongba among ajak temenen kümdaktsür, tanübo asenok ya limapurtema masü aser tamangertema masü ta tom ka nung asenok amangnüsü amongba purtem kümogo. Iba tamang jenjangji, tang ama Tsüngremmong mapang arudang asenoksasa khen meyipa repringshitsü nungdaker. Asen tsürabur mapang parnoki amongba benjong ajakji Tsüngrem külemba den sendaktepa liasü saka tanü asenoki amongba benjong hornbill ya koda? Tsüngrem nem tenüngsang agüja aser temoatsü meshia amongba Moatsü aser Tsüngremmong benjongtembo temenen saka Tsüngrem mali ama amongba hornbill benjong yabo temeshi benjong asü (?) ta asenok tamang o mapa na medemdanga, asenok Tsüngrem den tesendaktep yanglushitsüba mapangji Tsüngremmong mapang ya asütsü. Aji oda, asenok Tsüngrem den tesendaktep yanglushitsüba lenmang kaji, asenok sobaliba benjongtem ya akhi tsüraburtemi koda meshiteta aser pelatepa among, iba amaji tanü asenok Yisu dak amanger Khristan purtemia, Moatsü aser Tsüngremmonga, Khristan yimya nung amongtsüba nungdakji asütsü. Asenok sobaliba benjongtem ya jungjunga bilemdangra, Tsüngrem bushia sarasademba, Tsüngrem akümtsübuba külemba aser Tsüngrem nem tenüngsang agüja pelatepba mapang lir. Laishiba nung Filipi 4:19 nung ashir, "kü Tsüngremi Pa akaba yari, Yisu Khrista sentsüwangshi tashi nung, nenok nungdak ajak agütsütsü." Tenyar Paul-i ashiba o ya kodang asenoki jungjunga bilemdangdir, asen tsüraburtemia Pauli ashiba amaji, Tsüngremi Pa akaba yari asenok nungdak agütsür ta amanga liasü. Alima nung takar nisung kati pa akaba yari asen nungdak ajak nung yaritsü ta ashika asünunga, asen asoshi koda tepelatsüka asütsü. Aji oda, Tsüngremi Pa akaba yari asen nungdak ajak agütsütsü ta ashiba tenangzükbajibo amata masü. Iba o dak amanga asen tsüraburtemi mapa ajak sarasademer dang tenzü. Aji oda, parnok benjong amongbajia tanü asenoki amongba benjong amato masü saka shitakba tanüla nung aser atangji nung mapa agi sayua Tsüngrem külema among aser pelatep. Ashiko, akhi tsüraburtemi Tsüngremmong amongba o tanü asenoki Khristmas benjong tenüng agi sentep ka ana agia amongba na ya medemdangra, Tsüngrem tsüngdangbo akhidang tsüraburtemi Tsüngremmong amongbajiang temeshiba aser teindangba sür alitsüa shibai metet. Joko, asenokbo Tsüngrem dak amongba ya tangar jilu dang ajizüka masü saka asenoka asen sobaliba yimya nung Laishiba dak amendaker Tsüngrem külema aser Pa tenüngsanga pelatepa amongtsüsa sentong yanglutetsüla. Iba jagi dang asenoki amongba Tsüngrem den tesendaktep shitak yutetsü

OLEMSABANG

Onük: "Covid 19 Wara ya kar Asoshibo Takoksa nungi Temoatsü Asütsü Akok"

(Covid 19 Pandemic can be a Blessing in Disguise for some people)

Mr. O. Sashi Ozüküm Kohima

(Yashi adok nungi...)

3. Covid wara ya kar asoshibo takoksa nungi temoatsü asütsü akok.

Covid 19 wara ajanga tetsübutüsü aser tenokdangba aika liakasa tanü lanur aikati meranga inyakba angur, online shopping delivery boy/girl inyaker aika kümogo. Lanurtemi pei azüingba degree yari mapa angutsü meimlai joko meranga online ajanga mesera ano yimya balala nung mapa inyakteper. Sorkar mapa tenzüka jagi dang taküm mesüa (Survive) litettsü ta asütsü tangatetba melenshir. Pei sasa inyaketba (Entrepreneurship) nung renlokba angur.

Timtemer dang temeim mapa inyakba, sayuba kanga renlokogo. YouTubers aika kümogo, Kija jurila jenjang (Individual level) nung aser ano local news readers channel aika media ajanga renlokba angur. Lenmang balala (Facilities) aika liaka asenoki akhi nung bulua mamshiba ka iba Covid wara ajanga Zoom Meeting mesüra Google Meet ajanga tejak o tejakna ngutepa senden amenba aser webinar agiba ya temoatsü ka lir. Arogotemi social media platform yaah ta mamshi aliba iba lockdown ajanga joko arogotem ajaki media ajanga Tsüngremmer osangtajung sangdongba nung renlokba koda temoatsü. Akhi mapang nung sentepi moubai alirtem aser ano manemer, taintem (Senior Citizens) aika media ajanga (YouTube, WhatsApp aser Cable TV) ajanga tekülem nung atener aser Tsüngrem o angaa temoatsü agiba angur.

Kohima Ao Baptist Arogo nung fellowship 7 aser semi-fellowship 2 lir. Ni KABA nung tenzüker asünung ni ajangshiba kaji alima meshibangdang (Before Lockdown) Bodhbar aser Honibar aonung tekülem sentepi arurtemya 1500 shi liasü (Rough calculation). Saka Lockdown sür YouTube aser Cable TV aser Media Platform ajanga tang tekülem shia nung atenertemji minimum nisung 4000 tama lir. Kibong nung kinunger ajak külemi longjema melidangba iba lockdown ajanga longjemdaksüba ajurua arudagi. Ano kibong aika kinunger külemi sarasadema lumiba aser Laishiba züngtepa lai bushiba osangtajung aika angashir. Lockdown marudangbo taintem aikati onokibo smart phone-bo mamshitetsü ta alir aikati meranga angazüka joko smart phone amshia YouTube, WhatsApp ajanga Tsüngrem o angaba dang masü, saka alima koloni aoer mobile ajanga osangtsüsang ajak meteta akümba ya temoatsü ka lir.

4. Taküm libaliru, rongsen kettsüing aser anema alitsü jenjang repringdangba.

Merük-meju nung renlokba, achi ajem nung kümdangtepa den tashi eita alitsü temang anepalutepba (Health care) aser aikati chiyongtsü tajung chia physical exercise agiba angur. Iba wara ajanga telok telok senteper wawatepa mapa maka ama mapang indoka (Time pass) kazütepba ajema akümer. Kima yimdong mesüra shishilembalen nungdak tongtipang melira mejajai kidang aliba angur. Kibong aika nung lockdown mapang kibong nung terenlok mapatem kisü-jensüba, teka mapa inyakba, akok tashi sen bendena kiojen osettsüset tasen alilokba, ali kimung aliba, kari (Car) tasen aliba ano aika lir.

Alu yimertem dang masü saka Town nung alirtemia atsü (Kitchen garden) yimtepa aonsotsü meranga züsentepba aser shishilembaba (Marketing) nung renlokba angur. Tzumar non-locals aika pei limai meyipaogo, anungji kisertem, taxi amshirtem, shishilembartem, mapa balala nung asen local nisung teimba kümdagi ya terenlok aser temoatsüka masüna?

5. "Libaliru Tasen" (New Normal) nung ne teinyaktsü kechi asütsüla?

Covid wara süitema oaka asenok akhi libaliruba yimya chichilabato agibosa maotsü südi. Asenok joko kechisarena ajak "Yimya Tasen" kati ayaokogo. Iba ama tensa ka nung lanurtem tazünger meranga züngtepa aser "mapa meranga inyakba sobaliba" (Work culture) renloktsü merangtsüla. Na tazüngba tulu bener temetetba tulu liaka pei sasa pei taküm liyonga aotsü asoshi (Self sufficient) mesüetra takoksa tului aitsü, tagidak makai akümtsü aser tangari na jendoktsü. Ashiko asen sasa aseni lokti nungi jenshia atsükadoktsü. Ano aikati ni joko alima nung taküm aliba ya tetezü mali ta ashitsü. Tia makara aikati pei sasa soseta asütsüsa tebilemtsü arutsü.

Akhidang tsürapur temetetba meliaka tanur 10 lira ajaki aremzüa aki alu mapa balala inyak. Saka tanübo tanur kwika sodir tebilemtsüang tuluba akümba putu kati aor. Joko India kübok state aika nung sorkari kibong nung tanur ana dang asotsü "Two Child Policy" tenzüka angur.

Asen Aor Naga nung tangatetbaji bushidangra khu mejepba (Barber) tsüngsem arba (Cobblers) aser shishilembaba item mapaya tila-teri aser teküboktiba mapa (Below standard) ta belemer aser item mapayabo tsümar Bihari, U.P mesera Nepali nungertem mapa ama dang belemer.

Tanü kibongtem aika nung chirnur Engineering temer, doctorate renemer degree tajung balala renemer tapayutsüka aika kidang moktepar, tazüngba tulu liaka mapa maka tapayutsü jala jabaso aika iba tia nung lir, atangji ya kanga tesusatsüka lir. Anungji joko lanurtemi pei akokba mapa meranga inyaktepsüla. Kidang kibong nung ya tetsür tebur mapa telemsa mali, saka asen sobaliba tangatetba nung tia maka kaji tebur yimli (Patriarchy system) tali aroka yia amashiba ajanga kidang soruchokba, süoshi shidokba, ki aokba aser kiojen merük-mechoba mapayabo tetsür tanür mapa ta dang angatet. Anungji tebur shirnoki item mapa inyaker itemjibo lapi (Coward) ta dang angatet.

O Tembang :

Lockdown ajanga ner kibong dangi kechi takoksa aser kechi temelenshi aru? Hau Covid wara agi ajak dak effects asür ner ozü ta kecha bendangshidang mali. Aika Covid positive sür timtem aika agiogo aser ano aika timtema lir. Tapayutsü taküm aika samaogo ajaki kanga sasa belemer. Iba wara yagi tejak merepranger ajak sakuku tsübutepdaksür, shisabulutepdaksür aser takoksa ajurudagi. Süra ner kibong nung takoksa kiji asü, asü temoatsü mapanga liasü? Iba wara dak ya kecha tajung mali ta aikati shiogo, wara dak tajung kodaser alitsü. Saka kechiba iba wara ya takoksa nungi temoatsü asütsüsa asenoki meranga inyakba sobaliba renlokdi ta ayongzüker.

Kaket tajungtiba rongnung kaji Todd Henry-i züluba kaket tenüng "Tazüng Dang Süang" (Die Empty). Iba kaket zülusang kenü Business meeting ka nung atandang par directorbai asüngdang "Alima nung takartiba limaji kong lir" kati langzü "Oil rich Gulf States" ano kati ashi "Diamond mines in Africa" saka directorbai ashi masü takartiba limaji "Leper" (Cemetery) Alima nung meimchir million aikati pei nem agütsüba sempet, temetetba aser shisatsü tulu aika bener aji mamshii leper nung remogo ta ashi. Iba telangzüba ajanga Todd Henry "Tazüng Dang Süang" (Die Empty) ta asüba kaket zülutsü jangradaktsü ta ashir.

Iba kaket nung moral lesson-ji "Do not go to your grave and carry inside you the best that you have, perform it when you are alive" Alima nung taküm alidang ne sempet tajungtibaji amshiang leperi aji bener teyi ta ashiba angur. Covid 19 wara den joko asenok tembar kümogo, joko iba Post Pandemic/Covid tensa nung kija, kibong, Arogo aser loktiliba nung asenok ajaki joko koba ajanga tamanger ka tamang jenjang nung, ali shi taküm nung aser alirongsen kettsüing nung renloka aotsü ta shisadanga kechi tensa arudir aruaka asen tajungtiba agi temoatsü küma aientsü iba ocet azünger ajak ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Longkhum Baptist Arogo, Women Department-i July 23 nü aonsotsü agizükben bag 5 den bengana carton 3 Mokochung Covid Care Centre (CCC) kitchen atema tenlaba mapang tangokba noksa nung angur. Mapa tajung inyakba asoshi tetenlar dang CCC Nodal officer, Er. T. Imlisunep Ao-i pelaba lemsatep. Mokochung, July 23, 2021.

MULUNGTET

~ N. Imsu, Moalenden

Küm 100 shi (536-432 BC) tsungta Israel nung Babilon nungi Yirusalemi asembenren tashi oa Tenla Ki, yimti Jara teraksa yanglushiba aser tamangba yimsu, yimten yimli yimsoshia tanela nung asentenshia takum yanglushiba asenoki Ezra, Nehimia, Esther kaketter nung angur. Iba nung temoatsu anguba ka iba paper azunger den kuli sua lemsateper.

MEZÜNGBUBA APUSORTEM:

Persia chuba Cyrus tendak 536 BC meta Zerubabil aser Shesbazzar nungeri anir telok ka apusoa ao. Cyrus chubai ashi, "nenok ajak rongnung shibasa Pa nübür lir ... tuang, aser Kibuba Israel Tsüngrem Ki yanglushidakjang ..." (Ezra 1:3). Anungji Israel nungern parnok meyi tenem shi agi mulungteter apusoa ao. Iba mapang tesüiba Babilon yimli nung tongti yimsüsür tambur Daniel to ano Persia yimli nunga Cyrus chubai tematiba tongti yimsüsür asem rongnung ka shimtetsiba angur (Dan.6:1,2).

TANABENBUBAREN:

Persia chuba Artazerkses tendak 457 BC meta tezülür Ezrai anir parnok nisung 1754 shi apusoa ao. Iba mapang tamaren Persia yimli nung temulungjangji Yihuda nungern liasü. Yihudatsür Esther chubatsür aküm aser Yihuda nungern Mordekai chuba den tatong prime minister kümer bendang lima nung parnok tepuokertem ama mesüi kibur ama kümer taso shia jangratema liasü. Bendangertemi Yihuda nungern dang kanga tsübu aser aikati Yihuda senso aküm ta Esther tapu 8 aser 9 nung tatalokbatem angur. Iba mapang nung Esther tebuba Ahasuerus chubabo süadoker par jabaso (step-son) Artazerkses I chubaba mapang liasü. Chuba nem shisa agütsürtem par 7 (Ezra.7:14,15) rongnungji Esthara ka liasü ta ashir. Artazerkses chubai ashi, "... shibai Yirusalemi aotsü mulunga lir ne den aotsü akok." (Ezra.7:13). Parnok nisung 1754 shi rongnungji Levi kin nungibo temulungteter maliasü (Ezra.8:15).

TASEMBENBUBAREN:

444 BC. Meta Yihuda nungern Nehimia Governor ka ama Persia sepaitemi miner ao. Nehimia mulungsentsü aser pa dak sobua aliba jaklatem yamai liasü ; Sarasademba, Tasoli Meimba (Patriot), Mapa agi inyaka Sayuba (action), Tangar mesüzüksü tajung, Tasü tait, Tenoktangbatem liaka aremzüka Maneni inyakba (Perseverance).

Israel nungern Babilon doktsür Yirusalemi aotsü mulungtetertem ya atamata nisungtem masü ! Item ya par tsüraburtem tesüiba Asiria yimli tendak küm 300 shi tejaklen aser Babilon yimli tendak küm 150 shi tejaklen pur arurtem nungi aiben jakzüka aruba semchir semnurtem lir. Joko karbo parnok kong nungi jakzüka aruar memetetba purtema liasü (Ezra.2:59). Item ya Egypt lima nung Yosep memetetba chubatem kübok ala ashia timtema aliba purtem ama masü. Temalen shisemba ama item ya tepuokertem ama alar jenjang nung mesüi taso shia jangratema alibapurtem liasü, saka tamangba yimsü tsütsü Tsüngrem külemba nung timtem ajurua liasü. Anungji parnok aika rongnungi teraksa yanglushitsü mulungteter ishika dak ya chichia Tsüngrem meimba aser pei lima meimba mulungsentsü atenapur liasü. Nehimia dak aliba mulungsentsü aser jakla item daka suboa liasü.

MULUNGTETBA SÜLEN KECHI ?:

Parnok Yirusalem atongtsü ita 4 shi agia tsükchir limatem ajangdanga timtem jenti agia jajatsüla. Yirusalem meketa aliba tsükchir kintemi tasa tapu jenti agi amokmerena timtemdaksü. Yimti tulu, mapa tulu, nisung ishika dang, parnok talidak ki ano meyanglu (Neh.7:4). Pei taküm kibong nungdak atemabo inyaklen mapang maka. Joko chirnurtem sentsü yong alar jenjangi yoker (Neh.5:1-5). Nehimia-i governor chiyungtsü mehidang nübürtem den timtem tulu nung sarasadema mapa inyak (Neh.5:14,15). Tsüngrem ajaso chir shibai asenok alangzüksü aser yanglushidatsütsü atema temulungtetba tulu nung alimai aru, Paia timtem tulu nung Tebu Tsüngrem dang "... kechiba nai ni doktsür" ta ashitsüsa aküm. Sakasa Pai tebo Tsüngrem sentong nung timatem. Tebu Tsüngrem sentong ano merenemjungji liasü.

TAYONGZÜKBA O:

Asen lima yanglushitsü asoshi tematiba jenjang nungi tajemreptiba jenjang nung alir ajaki shilem agia inyaksüsa lir. Asen lima yanglushitsü mulungteter rongnung na atentsü asü meyanglushidaksüner rongnung atentsü ? Asen lima Khrista asoshi ta yim yim ayimba kija agi masü joko mapa agi kuli süa sayutsü mulungtetdi. Joko Tsüngrem sentongji asenok ajanga atalokdaksüdi.

Ne taküm yanglushitsü nungdaka ali asü. Yimti ka nung aliba kechisarena ajak dang nungi ne takümji taoba ta Tsüngrem Oi ashir ! Iba yongji Tsüngrem chiri Pa taküm na asoshi bendanga agütsüogo. Teraksa yanglushiba mapaji temela masü. Idakji timtem tekangshi aser tatitang jenti lir ta nai metet. Mulungtetba sülen timtem tekangshi aser tatitang mekai ang takokbajia aser tamakokjia maka ta nai metet. Nai asen kümetdakba Yisu Khristaji chichia meima lira naia memulungteti ang malitsü. Nai Pa dang chichia meima lira naia takokbajia mangu tashi seplasepsi masütsü ! Ni meteta lir angateta lir sür nung meinyakberba dang ta melili. Joko mapa agi kuli asütsü mulungteti. Joko Babilon doktsür apusotsü mulungtetdi.

ANO GO ABEN TSÜNGREM DEN

TEKÜMZÜKER SANNÜKER

"Saka atangji sayuba den apet O nai jembiang." Tita 2:1

Ano teyari asoshi tangatetba tanelaji külem temeshi pur telungjem aser Tsüngrem tenzükertem arur. Khristan shinga peisasa agi teperiba makümer. Telok ka kisung agi tabensa mekümtetter. Asenok kati ka nungdaker. Kodang asenok shirangdir temang ajunga agi iba mesen anema rarar. Kasaji tiyazü tesayuba mopung aser yipru anema raratsü asoshi liyim arogo (Khrista Temang) aser Pa lima rangpen Temang nungdaker. Asenok joko tiyazü tesayuba mopung agi septsü tentsü len monshidaksütsü asoshi arogo nung tenzükür balala nem shia aruba Khristai sempet balala agütsü (Ef. 4:11-16).

Yihuda nungern masüba Khristanem mejeptoktsü jembitsü Yirusalem mungdang jatepba nungi asenoki lesson ka angazükür. Kecha tependang meli-i Tanela Temeshi meküploktsüba tenyar Peteri kuli asü (T.M. 15:6-9). Iba indang Yakobi kechi "zülua" lir ta meyipa ashi (t.13-17). Aser ibai obang ka küma hai-aura katepa renem (t.22-28). Iba nungi tamangertem asoshi "tepela", "tajungshiba" aser "tashi" angu (t.30-32). Tamburtem aser tanishirtem dang asüngdangbaji Arogo otsü bushiba lir.

Kümdanga bushiba ajanga Arogo nung tesüiba pututem nung mapa tasen adoka sayua arubaji walok-watem tekülemba liasü ta bushiteta arur asüngtetdaksü. Asentenshi mapang nung Tsüngrem mapa den küpteptsü asoshi Satan aser pa tenyartem mazüngi mapa inyaker. Ibai tesüiba Tsüngrem mongin. Jonathan Edwards ama taküm kuli lir (1703-1758). Pa iba putu nung America nung filosofher aser theologian tulutiba liasü.

Tanü tesayuba nung tashishitsü aketba tasüngdangbatem noktangtsü asoshi tangara lir, "Süngjangji repringang." Saka taküm yimya melenshibaji dang "süngjangji" masü. Osangtajungji kanga tashi tait lir, nai ibaji tanga den meyoktepaka iba nung tajung kar adoktsü! Yisu dang nütsüngtemi parnok chiyongtsü bushitsü yokadokang ta ashidang, pai parnok dang chiyongtsü agüjang ta ashi, "Ni lokti asoshi aria bilemer" (Mt. 14:15, 16; 15:32). Sannükür kaji santer asoshi aria bilema chiyongshidak; tesayuba shidak agütsür lir.

Satania kotak tenyar ama kümer sayutsü akok, saka mapaji tatem anogo nung metettsü (2 Kor 11:13-15).

Temeim Oba Tsüngrem, temeshiba aser memeshiba bendangtetsü tanela shisatsü kü nem kua. Yisu tenung nung sarasadem, Amen.

Release Intl'-i India sorkar dang Khristanem kümzüksü mepishir

July 24, 2021: India nung i magizük.

Hindu yimsü alia amangertemi Yamaji state nung anti-Khristanem anema inyaksü conversion ozüng tasenba nükjidong nung, Khristanemi kübok Khristan 30 puogo.

Hindu nungern Khristan yimsü India nung Khristanem dangi kangshia meyidaksür ta timtemba dak sendakba nung tai tongloktsür, ta Release Release International CEO, International-i metetdaksü. Paul Robinson-i, iba linük atema tebilemtsü katsür, ta ashi.

Hindu nungern nütsüng timba aliba linük- India nung Khristan nütsüngbo shilem 5 dang nungi tajemba lir, ajisüaka linük nung nationalist movement aser kanga bulua kümdar, aser ibaji Hindutva ainba mapang nung ajanga Hindu yimsü alia Khristanem kanga timtemer, amangertemi linük nung tanga ta Release International-i yimsü amangertem metetdaksü. magizükterba kanga bulua akümba kuli sayur," ta metetdaksü.

Hindutva tangatetbaji, India nung Khristan aser Muslim "Onoki Ato kilonser, nungernbo chichiba India nung Narendra Modi dang linük nung masü, ta parnoki züngshia Khristanem densema Khristan aser Muslim nungern minorities kümzüksü atema inyaksü mepishir," ta pai metetdaksü.

Tawa Uttar Pradesh kübok Mansura yimdak arrshi küm 23 Khristan, Anamika Gautam Boris Johnson dang India nung dak lokti kati süng aser insang Khristanem reshikangshiba amshia azük. anema ola adoka jembitsü mepishir," ta pai ashi.

Hindu yimsü alia amangertemi Anamika Gautam "Onoki Johnson dang India aser tebu nati Hindu nungern Ato kilonser, Narendra Modi dang linük nung taremzüktep meyidaksür, ta tai tonglokja maliba sobaliba anentsü atema liasü. inyakang ta ashitsü mepishir," ta Release International tongti

Tebu tenati police station nung ken o agütsü saka police-lenirisa metetdaksü.

OLONG PAITEP # 5885

1		2			3		4		5
				6		7			
8									
						9			
				10					
11									12
					13			14	
15									
16									17

TIPILEN		LANGTSÜNGLEN	
1. Nüji masü	- (4)	1. Jila tulu	- (5)
3. Technütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anügdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5884 TELANGZÜBA

TIPILEN :		LANGTSÜNGLEN :	
1. Taa, 3. Teküm, 6. Aibelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kioksü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	

KOMA SÜLA TELANGZÜBA

Q. Akhi tsüraburtemi yim akümdang yatetba ali kimong aser alushi dak alaka, tanü putu tasenba nung kibong kati ajangzüktetba ali rongsentem madakbo, kibur küma senmangtsü asoshi, tetsür - tebur aser jala- jabaso ta mali, kibong nung tsürabur ana mulung südaktsü nunga koma süla ?

Akhi otsüla oboula nungeri benshia aruba ama senmangtem, alu/komong amalaji akhi kechi lir yamaji doktsür, apu-ani nati ajangtetba ki-o-jen, osettsüset kechisa tena akümü dang benden, itemjibo tena nem moatsüba jala jabaso ajak nem lemsaa agütsü nungang kanga ajungtsü.lba nungyabo kidang-kimangia mangu ama doksütet nungbo koda jungla!

- WhatsApp

Asen Aotsür business inyaka Delhi nung alidang Nigeria nunger nisung den sati süa liadok.Tepela nung tebuti jala nem Dimapur nung aliba ali kimong ka senmang ama agütsü. Mapang kobi melie jalaji süadok, joko tebuti ali tu magütsünü kumadok. Saka tekolokbo tanak masüji legal ajanga ali kimongtu agiadok. Tangbo Nagand nung Ali kimong tila ka nungtu lisopur ama nüjiso ajak züsenteta lidagi.

-Mar. Naharbari

Tesüba putu nunga tsüraburi tetsür nem ali kimong lemzüksüba lir nung, koda tang putu tasenba indangjibo kecha jembitsü mali kechiaser tang putu nung yabo yimten nunga tetsür temeten lir sürapangla pei kibong sasep nung ajangzüktetba rongsen nungjibo tetsür tebuti kenyongi mepentangtsüla.

- ns jr cmd

Shidak, jungla. E.g-Kinungtsü dena züsentetba, alitenba ali-kimong lir, yangji kin kidongi, kichai inyaktetba kangabo matoker. Pei chalabo kima anizüka toktsür, senmanger tang amangba yapo majunga.

- SMS

Akhi tsürabur mapang nungi asenoki benshia aruba kanga tongtipang, saka tanü putu nungbo ya tetsükdaktsü/teratatsü adokbaji senmang ya lir. Joko aika yimtsung telung nung dang alir masü alinük tesem ajak nung prokshia alir. Kar kibongbo England, America, India tesem balala nung putu jena parnok sasa ajangtetba, aazükba kimong, ali, kim, rongsen jenti madak kibur kümer, karbo kinungtsü kijai aazükba rongsen jenti nung kibur kümer semchirtem tashi yamaji lir. Anungji yimtak yimtsung nung süli, par alidak süli, tsürabur anati molungba ama jala jabaso mebandangi senmangtsü parnok molung südaktsü kanga tajungba süla. Aser ali tsüraburtemi yatetba kimung alushiji tang senmanger asütsü.

- SMS

AO OSHI ANGAZÜKDAK:

TANÜ ANGAZÜKTSÜBA OJANG



Kidang

(n) talidak ki, ki nung (at home)

* Lockdown mapang nisung ajak **kidang** amonger.

Kilir

(n) kidang yaritepa alir,ki mapa nung yarir (servant)

* Kidang **kilir** ayuba agi tanurtemi ki mapa mangazüker.

NAI-A YA METETTER MA?

INDIA NUNG NÜNGTUGU TSÜNGSANG (Dance) KAR

- Bharat Natyam	Tamil Nadu	- Khantumm	Mizoram
- Bihu	Assam	- Karma	Madhya Pradesh
- Bhangra	Punjab	- Laho	Meghalaya
- Chhau	Bihar, Orissa, West Bengal and Jharkhand	- Mohiniattam	Kerala
- Garhwali	Uttarakhand	- Mando	Goa
- Garba	Gujarat	- Manipuri	Manipuri
- Hattari	Karnataka	- Nati	Himachal Pradesh
- Kathak	North India	- Nat-Natin	Bihar
- Kathakali	Kerala	- Odissi	Orissa
- Kutchipudi	Andhra Pradesh	- Rauf	Jammu & Kashmir
		- Yakshagan	Karnataka

TANÜBO NAI LANGZÜANG

Q. India nung ___ indang fiber network tulutiba asütsü.

- A. BSNL
- B. Airtel Xstream Fibre
- C. Reliance Jio Fiber
- D. Excitel broadband

=====(Taruba adok nung onoki langzüsü)

YASHI ADOK TELANGZÜBA : LIC

SUDOKU # 5925

TELANGZUBA # 5924

3	9		4		6				4	2	6	9	3	5	8	1	7
		7				3		2	8	1	3	7	2	4	6	9	5
		6	3	7		5			7	9	5	8	1	6	2	4	3
		3		4	9				9	3	8	2	5	7	1	6	4
7	6					4	5		2	5	4	1	6	8	3	7	9
9		4		6	7		1		1	6	7	4	9	3	5	2	8
1	5			3			2	6	3	7	2	5	4	1	9	8	6
4									6	4	9	3	8	2	7	5	1
		9			2		4	7	5	8	1	6	7	9	4	3	2

OJANG LUTEP # 5470

PAMA	:	<input type="text"/>
TNGAJU	:	<input type="text"/>
KERINYA	:	<input type="text"/>
JASAMSENASA	:	<input type="text"/>
ERAS	:	<input type="text"/>
ATTSÜBALAAJI	:	<input type="text"/>
GKKANI	:	<input type="text"/>
LAKTSÜODABA	:	<input type="text"/>
END	:	<input type="text"/>
KUSA	:	<input type="text"/>

OJANG LUTEP TELANGZÜBA # 5469

BILEMA INYAKRA LENDONG NUNGI JENBOR SAKA MEBILEMDANGI INYAKBA MAPAREN AYATAI

TAN HOPTA ATEMA - KOMA SÜLA ?

Q. Nagaland nung Covid vaccination ya nisungtem teimba ka dak magii anen nunga koma süla ?

Olong 20 shi nung July 30, 2021 tashi nung iba telangzuba ya onok dangi (e-mail - tiryimiyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.

Maharashtra nung tzümetzung lendong nung nisung 138 süogo



July 24, 2021 nü Karad nung tzünglu maneni aruba ajanga Koyna-Krishna ayong nung tzü kanga metsünga sülen tekülem kitem aser dokantem tzü agi mobanger aliba noksa nung angur.

Mumbai, Chiteni/July 24 (Agencies): Tesüiba anogo ana tsüingda Maharashtra nung anentsüh lendong densema tzünglu dak sendakba lendong balala nung nisung 138 süogo, ta Honibarnü ketdangsertem osang ka ajanga metetdaksü.

Kolhapur district nungi nisung 40,000 dak tema densema nisung 84,452 shi ainshidakja Western Maharashtra kübok Pune division nung jenokdaksüogo, ta ketdangsertemi metetdaksü.

Honibarnü linük Tir, Ram Nath Kovind-i phone ajanga Maharashtra Angh, Bhagat Singh Koshyari den jemi aser state nung tzünglu den tzümetzung ajanga nisung jenti asüba aser kiojen jenti samaba atema mangyim jashi lemsatapa liasü.

"Tir Ram Nath Kovind-i Maharashtra Angh, Bhagat

Singh Koshyari den phone ajanga jembio aser state nung tzünglu aser tzümetzung lendong ajanga nisung jenti asüba aser kiojen jenti samaba atema tejashi lemsatap. Angh-i Tir dang nüburtem timtem pungbatsü atema kümzükba maparen inyakba den külemi relief agütsüba osang metetdaksü," ta Rashtrapati Bhavan-i twitter ajanga metetdaksü.

Honibar tashi nung state kübok Raigad district nung tzünglu dak sendakba lendong balala nung nisung 47 süogo, aser iba nungji Taliye yim dak anentsüh lendong nung nisung 37 asüba densema lir, ta state disaster management department-i metetdaksü.

Tanünga nisung 10 ji kasa district nungsa tesem ana nung anentsüh lendong nung asürtem lir, ta kasa osang ajanga metetdaksü.

Taliye yim dak anentsüh lendong nung nisung timba süogo; Ratnagiri nunga nisung 11 asü aser Satara nung nisung trok asü.

Kolhapur nunga nisung pongu asü, Mumbai suburban nung nisung pezü asü, Sindhudurg nung ana asü aser Pune nung nisung ka asü.

"Nisung 59 samaogo aser parnok 53 bo Raigad nungi lir, Satara nungi pezü aser Thane nung nisung ana sama," ta kasa osang ajanga metetdaksü.

State nung sorkar agency balala nungi team 21-i rong 59 amshia kümzükba maparen inyakdar.

Raigad district kübok Taliye yim ya anentsüh lendong atalokba tesem ka masü, ajisüaka tzünglu maneni sashia aruba ajanga iba yim dak anentsüh lendong atalok, ta state Deputy Chief Minister, Ajit Pawar-i metetdaksa liasü.

Media ola nembangtsütsü atema sorkar agencies amshir: EGI

New Delhi, July 24 (Agencies): Income tax department-i, Dainik Bhaskar aser Bharat Samachar-i saru shidak magütsür, ta tai tonglokja parnok indang office tem mita aoba sülen anogo ka lir Editors Guild of India (EGI)-i, osangbenertem sadema meinyakdaksütsü atema sorkar agency balala hadir ama amshiba atema onoki tebilemstü akar, ta metetdaksü.

Hokolbarnü EGI-i sangdong ka ajanga, "July 22, 2021 nü Income Tax ketdangsertemi linük nung tongti newspaper group- Dainik Bhaskar aser Lucknow nung amenoka aliba Independent news channel-Bharat Samachar indang office tem mita aoba atema Editors Guild of India-i tebilemstü akar," ta metetdaksü.

EGI dak alia Press Club of India, Community to Protect Journalists aser Indian Women Press Corps-ia sorkar agency kati media groups anema inyakba atema aitsüogo.

Iba ya jurila tashi aliba media amokmerentsü aser nokdangtsü nükjidong nung inyakba lir, ta telok balala sorkar agency aitsüogo.

Dainik Bhaskar national editor, Om Gaur-i ashiba agi, parnoki New York Times osangkaket densema osangkaket balala nung sorkar anema oset adoktsüba sülen sorkar department balala nungi company dangi advertisements marur, ta metetdakja liasü.

Iba dak sendakba nung EGI-i, "Media dak jurila tashi lir saka media ola nembangtsütsü atema

sorkar agency tem amshiba atema onoki tebilemstü akar. Tawa osangkakettem nung Pegasus indang software amshia osangbenertem aser lokti lenirtem itangitba osang prokba mapang ka nung yamai atalokba meteta mepelar," ta metetdaksü.

Uttar Pradesh nung coronavirus wara junga mazioktetba atema sorkar dang ashishia tasüngdangba akartem rongnung Bharat Samachar densema lir, ibayongji sorkari parnok anema inyaker, ta EGI-i metetdaksü.

Committee to Protect Journalists telokia, India-i akhidang nungi osangbenertem sadema inyakdaksüba asüngsashitsüla aser nüburtem dak sendakba onüktem atema osangbenertem sadem-sadema inyakdaksütsüla, ta metetdaksü.

Indian Women's Press Corps-i, Dainik Bhaskar aser Bharat Samachar-i tasü itta osangtsüsang prokbaji onoki nungiter, ta metetdaksü.

Taoba Amongnü International media kati, sorkar agencies dang ang ayokba Israel nung spyware ka amshia India nung nisung 300 dak tema phone ajanga itangiter asütsüa akok; mobile phone number 300 dak tema jangjaogo aser item rongnung tang teinyakdak minister ana, osangbener 40 dak tema, tongtibang opposition lenir asem, Supreme Court judge ka, shishilembartem aser India nung activist tem aika indang phone numbers densema lir, ta metetdakja liasü.

Tanurtem dak Covaxin tendangba osang Sept. nung jangjatsü: AIIMS

New Delhi, Chiteni/July 24 (Agencies): Bharat Biotech indang coronavirus vaccine-Covaxin tang tanurtem dak shilem asem lemsar tendangdar, aser iba osangji taküm September ita tashi nungbosa sangdongtsü, ta Honibarnü All India Institute of Medical Sciences (AIIMS) director, Randeep Guleria-i metetdaksü.

Osangbener den jembidang Guleria-i, "Tang India nung aliba vaccine tanurtem dak

tendangdar. Bharat Biotech-i tanurtem dak vaccine tendangba maparen tatembangleni arudar aser September ita tashi nungbo onoki osang angutsü," ta metetdaksü.

"Taruba hopta tem mesüra September ita tashi nungbo tanurtem atema vaccine angutsü. Asenoki shilem lemsar class sasep nung school tem lapoktsüla, kechiyong tang arrshi küm 18-45

tsüngdapurtem atemabo yamaji inyakdar aser ibaji ajanga tanurtem kümzükba lir ta nüburtemi tamang katettsü," ta pai ashi.

Shilem asem lemsar tanurtem dak vaccine tendangdar. Mezüngbuba shilem nung arrshi küm 12-18 tsüngdapurtem dak tendang, iba sülen arrshi küm 6-12 tsüngdapurtem dak tendang, aser tang arrshi küm 2-6 tsüngdapurtem dak tendangdar.



New Delhi, July 24, 2021: Honibarnü Rashtrapati Bhavan, New Delhi nung India Tir, Ram Nath Kovind aser pa kinüngtsü, Savita Kovind na den Union Finance Minister, Nirmala Sitharaman nungeri SBI branch tasen ka semzüksü dang tangokba noksa nung angur. Tang mezüng Rashtrapati Bhavan telongtet nung SBI branch lapoker.

India nung ano nisung 39,907 dak Covid putet aser 564 asü

New Delhi, Chiteni/July 24 (Agencies): India nung ano nisung 39,097 dak coronavirus putet aser iba tashidak agi shiranger 564 süogo; tang tashi nung linük nung nisung crore 3.13 dak coronavirus putetogo aser iba tashidak agi shiranger lakh 4.20 süogo, ta Honibarnü Union Health Ministry data ajanga metetdaksü.

India nung coronavirus agi shiranger shilem 97.35 (nisung 3,05,03,166) anepogo aser iba tashidak agi shiranger asüba shilem 1.34 kümogo.

Hokolbarnü samples 16,31,266 tendanga liasü, aser tang tashi nungbo samples ajak senteper 45,45,70,811 tendangogo, ta

ICMR-i metetdaksü. Tang anogo shia coronavirus positive putetba shilem 2.40 dang lir aser tesüiba anogo 33 tashi positive putetba shilem 3 den tajemba lir.

Tang tashi nung India nung coronavirus vaccine dose crore 42.78 agütsüogo.

Yaküm August 7 nü nung India nung Coronavirus case lakh 20 ajung, September 16 nü case lakh 50 ajung aser December 19 nü coronavirus case crore 1 ajung.

Taküm May 4 nü linük nung coronavirus case crore 2 ajung aser June 23 nü crore 3 ajungba sülen tang tashi nung case crore 3.13 jungogo.



July 24, 2021 nü Mumbai nung BJP züngsemtemi Borivali station kima nokdaker coronavirus vaccine dose anaprong agirtem nembo train service facility agüjang, ta takhangba agüja longkak aitba noksa nung angur.

Kashmir nungertemi parnok sasa telemtetba agitsü: Imran Khan



Imran Khan

Islamabad, Chiteni/July 24 (Agencies): Kashmir dak sendakba nung Pakistan-i sangdonger aliba policy nungi pilar Ato Kilonser Imran Khan-i Hokolbarnü, Islamabad-i Kashmir nung aliba nüburttem nem Pakistan nung adentsü mesera state balaka kümtettsü atema telemtetba agidaksütsü, ta ashi. India-i Jammu and Kashmir ya India kübok liasü aser teti India kübok alitsü ta shia arudar.

July 25 nü election agitsü lia Pakistan-occupied Kashmir (PoK) kübok Tarar Khal tesem nung election rally ka nung shilem agiba mapang Khan-i, Opposition lenirtemi Kashmir ya

Pakistan nung province ka kümdaksütsü atema sorkari sentong yangludat ta ashiba aitsü. Pakistan Muslim League-Nawaz (PML-N) lenir Maryam Nawaz-i, POK nung July 18 nü election atema nüboyimba sentong ka nung shilem agiba mapang, Kashmir dak sendakba nung tang telemtetba agir aliba meleshia province ka kümdaksütsü telemtetba agiogo, ta ashiba sülen pai iba telangzüba agütsü.

"Item o ya kechi nungi pokteter ni memetet," ta Khan-i ashi. Iba melena Ato Kilonser-i, anogo ka arutsü aser iba anogo Kashmir nungertemi UN resolutions dak ajemdaker

telemtetba ka agitsü atema temelaba agütsütsü aser Kashmir nung alirtemi Pakistan nung adentsü atema shimtsü, ta ashi.

Paisa, UN-i agizüker aliba referendum dak ajemdaker par sorkari, Kashmir nungertem Pakistan nung alitsü mesera jurila state ka kümteter alitsü atema maongka agütsütsü asoshi referendum ka ayongzüka akatsü, ta ashi. Kashmir dak sendakba nung Pakistan-i sangdonger aliba policy nung iba ken o ya UN resolution dak ajemdaker referendum ka agia bentettsü benoka lir.

Ato Kilonser-i policy nungi pilar lenmang tasembuba indang jembio, saka UN resolution nung nüjiso indang lenmang tasembuba benoka mali. India-i taoba mapang Jammu and Kashmir Union Territory ya India kübok lir ta shiogo. New Delhi-i Islamabad dang Jammu and Kashmir ken o ya India telung ken o lir aser iba tebilemsü bentettsü asoshi India dak tashi lir ta shiogo.

Covid-19: Hanoi yimti mokdanga yuogo

Hanoi, Chiteni/July 24 (Agencies): Vietnam sorkari Honibarnü Hanoi nung nisung million ti mokdanga yuogo. Tawa coronavirus tashidak kanga kara prokshia aoba sülen linük nung nütsünyongsük asemsü kidang nungi manishi lidaksütsüsa kümogo. Kitdangsürtemi linük nung Hokolbarnü nisung 7000 tema dak tashidak potetba metetdaksüogo.

Linük yimtiba, kong nüburttem kanga mazüangi inyakteper iba yimti mokdanga ayutsü atema tetuyuba agütsüba sülen kanga azüngmeyaka kümogo, ajisüaka yimti tezülenbo nüburttem yimtung nung maneni senzüsenpongdar.

"Ni ama yimti nung aliba nüburttemi yimti mokdanga ayutsü atema ajungbena telemteba agiba agizüker asütsü ta bilemer," ta yimti nung alir Nguyen Van Chien-i ashi.

"Wara den raratsü atema

rongsenketzüung nung takoksa ajuruba aremtsüla," ta pai ashi.

Taoba küm coronavirus tashidak poktetba kanga junga azüoktetba sülen April ita tatemlen nungi Vietnam nung tashidak kanga kara prokshi odar aser nisung aika dak tashidak poteta arudar.

Vietnam nung nütsünyongsük million 100 nung asemsübo tenokdanga balala agütsüba agi kongshiogo.

Kasa mapang nung linük nung tashidak prokshia aoba tajemba akümba temaitsü karbo sayuogo ajisüaka anüolen tip nung aliba Ho Chi Minh, kong tawa nisung aika dak tashidak potetdar, iba yimti nung nüburttem kidang nungi mainshitsü atema tetuyuba agütsür aliba ano Hokolbarnü atsülangshitsüogo.

"Ni kidang nungi ita kashi mainshir. Yimti nung tensa tetsübuttsüka," ta Minh nung alir Le Bich Thanh-i AFP dang ashi.

Ketdangsürtemi yimti merektet tenzüko, koba parnok ashiba agi hopta ka shi agitsü.

Wara poktetli tashidak kanga junga azüoktetba atema Vietnam nung shishilemba kecha tetsükdaksü makai kanga takok ngua tejalen benerogo.

Ajisüaka iba linük nung vaccine alizükba aser agütsüba inyakyim tangar dang nungi temenuba tenzüker aser tang tashi nung vaccine dose million 4.5 dang agütsür lir.

Vietnam nunga vaccine ka yangludat aser ketdangsürtemi ashiba agi 2022 küm tetenzüklen tashi nungbo herd immunity ajangzüktettsü imlar.

Vietnam nung tashidak menar ajak mozükidang temang anepalutsü atema inyakyim ka benoka lir aser iba ajanga mozükitem aser medical worker tem nem khuret talila agütsür, ajisüaka linük kübok tesem kar nungbo iba tetuyuba ya aginogo.



Afghanistan nungi US aser NATO sepaitem atsünginba mapang tensa kanga mejungi küma aoba apir Pakistan-i Afghanistan den arrtsü nung tongtibang tesemtemi sepaitem yokogo.

OFFICE OF THE
JANGPETKONG STUDENTS' CONFERENCE
H.Q. : Alongkima, Dist:- Mokochung : Nagaland.
Motto :- "Advancement in Unity"

TENÜNGSANG AGÜTSÜR

NBSE ajanga 2021 küm agiba HSLC aser HSSLC tatidang nung shirnokisa temaba jenjang nung takok ngutetta asen JKTM nem konang bener arutsü nung Tsüngrem tenüng asanger aser nenok ajak nem tenüngsang aser tetushi lemsateper.

- Kr. Talisangla Longkumer** D/o Watilemba Longkumer, Mongchen Top 10(e) HSLC
- Sp. Mongdilokba Walling** S/o Lanutemjen Walling, Khar Top 12 (c) HSLC
- Kr. Sentimenla B Ao** D/o Late. Bendangnukshi Ao, Molungyimsen subject topper in Environmental Education HSLC.

Iba den külemi Jangpetkong kaketshir kiwikati HSLC aser HSSLC tatidang nung takok ngutetogo, nenok ajak nem JKTM -i tenüngsang agütsür.

Sd/-
IMLIAKUM
EDUCATION SECRETARY
JKTM.

OFFICE OF THE
AO STUDENTS' UNION CHANGTONGYA TOWN
PO- CHANGTONGYA-798613, DIST. MOKOCHUNG

TENÜNGSANG AGÜTSÜR

YASHIJUNGLA
D/O Late. Lemdongnukshi
TOP 16, HSLC 2021
Christian Standard Hr. Sec. School
Changtongya Town



Changtongya Town nüburttem aser kaketshirtemi küm aika tejaklen nungi yongya ataba asangsang nung ataloka Kr. Yashijunglai HSLC 2021 nung Top 16 jenjang ngutetba asoshi la nem Ao Students' Union Changtongya Town ajanga tenüngsang tulu agütsür. Lai iba naroküm tulu ajangzüktettsüsa tsürabur aser tesayurtemi la meranga nongitba asoshia nenok ajak dang pelaba shisemer.

Yamaji ASUCT züngsem shirnoksa taküm HSLC aser HSSLC tatidang nung takok tajung nguogo, nenok ajak nem tenüngsang agütsür. Tsüngremi nenok kaketshiba wadang nung maneni moajangma.

Sd/-
TEMJENSOBA
President

Sd/-
TOSHIYANGLA
General Secretary

US-i Afghan refugee tem atema USD million 100 agütsütsü

Washington, Chiteni/July 24 (Agencies): US tir Joe Biden-i Hokolbarnü, Afghan special immigration visa applicants densema Afghanistan nung tang mepetmesü adoker aliba nungi poktetba jongdak maparen nung intoktsü atema USD million 100 temelaba agütsüogo, ta White House sangdong ka ajanga metetdaksü.

Biden-isa, kasa tenüngdakbatem peridaksütsü atema US sorkar inventories nungi services aser article nung USD million 200 salatsüogo, ta kasa sangdong ajanga metetdaksü.

Afghanistan nunger US sorkar atema inyakerkem shirnok Taliban pur ket nung lendongbang nung lir, item Afghan nunger shirnoki special immigration visas (SIVs) atema benokogo, parnok anintsü atema United States renemdar.

Afghanistan nungi aninertem parnok kibong den külemi iba ita tatemi mezüngbuba Virginia nung US military base, Fort Lee-i anir aotsü imlar, kong parnok visa atema benokba ataa alitsü.

Afghan nunger 2,500 shi iba facility yagi anir aotsü, koba Richmond nungi mile 30 shi pilar lir ta Pentagon-i Hombarnü metetdaksüogo.



Biden administration-i United States aser bendanglima nung US indang facilities tem asandangdar, kong SIV applicants aser parnok kibongtem lidaksütsü.

2001 küm nungi US-i anir Afghanistan amakba mapang nungi tenzüka oshi meyipzüker aser tanga mapang nung US sorkar nem teyari agütsür Afghan nungertem nem Special immigrant visas agütsütsü.

Brehostibarnü US House of Representatives nung ozüng ka agizükogo aser iba dak ajemdaker SIV 8,000 tashi agütsütettsü aser iba ajanga temsüa aliba application tem ajak ayimjemtsü.

Ibala mesükba application 18,000 shi benoka inyaksangshidar, ta US ketdangsürtemi ashi.

Karan Johar-i 'Bigg Boss OTT' host asütsü



Mumbai, Chiteni/July 24, 2021 (Agencies): Bigg Boss OTT indang host atema tongtibang nübu talisa Sidharth Shukla, Farah Khan aser Rohit Shetty nunger rongnung ka shimtsü akok ta osang balala ajanga angazüka aruogo. Item rongnung nisung ka shimtsü imlaa ata alidang, nungtugu reality show indang digital mini version ya Karan Johar-i host asütsü ta osang jangjatsüogo.

Iba reality show special series atema, film yanglur Karan-i Salman Khan tsüngsü nung ajemoka maparen achaayangtsü terenemba lir. Bigg Boss OTT ya August 8 nü Voot nung sayutsü.

Sangdong ka ajanga

angazükba agi, iba series website ka nung sayutsü renemdar asünung, iba series taoba dang nungi balaka asütsü. Karan Johar show nung tongtibang nisung den onük balala nung sensaksemba ajaki jangjaa lir aser iba OTT version atema pa tetemjen asütsü.

"Karan-i Bigg Boss indang yimyatem pelashishia agizükogo aser iba web version ajanga lanurtem atsüa arutsü asoshi pai iba show nung host inyaksü yongya atadar. Taoba mapang sayuba TV show dang nungi iba version tatsüba asütsü. Iba show temli dang Karan-i "Rocky Aur Rani Ki Prem Kahani" atema maparen

tenzüksü sentong lir," ta sangdong ajanga metetdaksü.

Koffee with Karan indang season balala nung Karan Johar-i host inyakdanga lir asünung, pai show tasenba ya ayong ayonga ketdang asütsü imlar. Karan-isa What the Love! ta nungja agütsüba dating show ka nung host inyakogo. 2020 küm Netflix nung iba show sayuogo. Item dak alaka, Karan-i reality show talisa India's Got Talent, Nach Baliye aser India's Next Superstar sentong nung tetendanger ama shilem agiogo.

Bigg Boss OTT dak sendakba nung jembiba mapang, Karan-i, "Kütsü künapronglai Bigg Boss kanga sapua repranger aser show indang season ajak repranga aruogo. Viewer ka ama, iba show reprangdang ni jangratemer. Küm aika atema ni show balala host süa arudar aser tang Bigg Boss OTT nung host inyaksü maangka anguba ya ajak dang tulutiba asütsü. Kütsü mangdang atangji nunga shitak atalokogo," ta lemsatsep.

Jordan Peele-i 'Nope' yanglutsü

New York, Chiteni/July 24, 2021 (Agencies): Oscar takok angusang film yanglur Jordan Peele indang tasembuba film nungja - 'Nope' asütsü ta sangdong ajanga metetdaksü. Peele-i social media sabang ajanga iba film nungja den külemi official poster ka lemsatapa liasü.

'Nope' nung, Peele-i 'Get Out' star Daniel Kaluuya den longjemer inyaksü. 'Judas and the Black Messiah' nung shilem tajung agiba atema Daniel-i Oscar takok nguogo.

Iba movie nung 'Hustlers' actor Keke Palmer aser 'Minari' actor Steven Yeun nati külemi shilem agiba angutsü. 'Nope' film ya July 22, 2022 nü America nung mezüing sayatsü sentong lir. Tesüiba küm ishika nungi,

Peele ya director tajung ka ama horror genre' tsütsü takok tajung ngua arudar.

Monkeypaw Productions nungi Ian Cooper aser Universal Studios den longjemer Jordan-i iba film yanglutsü.

Director wadang nung ajemoka Jordan-i 'Get Out' yanglua liasü. Iba film 2017 küm saya aser takok anguba film rongnung Jordan indang mezüing project liasü. Kasa küm, iba film ajanga USD 255 million aazükba. Jordan-i USD 4.5 million indoka iba film yanglua liasü.

'Get Out' film ajanga Best Picture aser Jordan atema Best Director densema Academy Award nung nomination pezü angu. Best Original Screenplay

atema film yagi the Academy Award takok angu.

Iba sülen, Jordan-isa horror genre' nung Us' film yanglu, koba 2019 küm sayaa liasü aser iba film nung Lupita Nyong'o-i tongti shilem agiogo.

DECLARATION :

I Smti. IMNUKSUNGLA w/o Chuba Ao, R/o Chakpa village, P.O.Chuchuyimlang, Dist: Mokokchung, Nagaland hereby solemnly declare that my name has been used incorrectly in the LF/135 Pension Payment order book as IMMUSUNGLA Ao, whereas my correct name is IMNUKSUNGLA and I further declare that IMNUKSUNGLA shall be my correct name in all future official use.

KANGASA PELAR

Onoki teti meima alila ojala, Asür **Wt. TALIKALA (CHANGKI)** W/O Late Sosangrepa Alinger, Kibuba den alitsü asoshi July 16, 2021 nü la iba akümlü nungi pilar la den asüpila sentong nung onok den longjemer ajak dang pelar. La shiranga alidang aser iba akümlü toktsür orr sülena nenoki ozü dang temeim sayua aser nungita yariba atema nenok ajak dang pelar. Ozü asükhu mapang nenoki shisatsü aser mapa tajung ajanga onok tanela nung tashi itdaksüba atema pelar ta ashitsü tebang agi dangbo abensa meshiteteter. Nenok mapa tajungtem teti bilemettsü. Yisu kabuma nung ojala tesünep nung lir ta meteta onok mulung süngzükur.

- Temeim Adianutem.

"Nü taküm temoatsüba ka liasü, Nü mapa tajungtem senti süa bilemettsü, O agi rasa meshiteti onoki na meimer aser kecha agia masadangtetit menunrar."

OFFICE OF THE ONGPANGKONG STUDENTS' CONFERENCE (OKM)

KHONANG TETUSHI AGÜTSÜR

Ongpangkong Kaketshir Mungdang (OKM) ajanga asen Tzükongsanger kaketshirtem shirnokisa NBSE ajanga agiba HSLC aser HSSLC 2021 tatidang nung alakteta temaba jenjang nung takok tulu ngutetogo, nenok ajak nem tenüngsang agütsür. Iba den külemi State Subject Topper jenjang tongtetta takok ngutetter aser tatidang balala nung asen Tzükongsanger shirnokisa jenjang balala nung takok ngutetogo, nenok ajak nem asen Ongpangkong Kaketshir Mungdangi tenüngsang tetushi agütsür. Nenok takok tulu ngutetba asoshi Tsüngrem tenüng asanger.

HSLC						
SL.NO	NAME	TOTAL MARKS	PERCENTAGE	RANK	SCHOOL	YIM TENÜNG
1	TALINUNGSANG IMCHEN	587	97.83%	TOP 3	Queen Mary Hr. Sec. School, Mokokchung	Mangmetong
2	LIMATONGZUK LONGKUMER	580	96.67%	TOP 11	Straight Way Hr. Sec. School, Mokokchung	Longsa
3	AOTUSHI IMSONG	579	96.50%	TOP 12	Ministers' Hill Baptist Hr. Sec. School, Kohima	Ungma
HSSLC (ARTS)						
4	IMLISUNGLA PONGEN	484	96.80%	TOP 1	ST. Paul Hr. Sec. School, Dimapur	Longmisa
5	YIMTIYONG LONGKUMER	458	91.60%	TOP 7	Unity Christian Hr. Sec. School Diphupar	Ungma
HSSLC (SCIENCE)						
6	IMCHARENBA ATSONGCHANGER	467	93.40%	TOP 6	Queen Mary Hr. Sec. School, Mokokchung	Mokokchung

Sd/-
(LIMATONGZUK JAMIR)
Tir, OKM

SD/-
TAKOTIBA JAMIR
Shisaliok Zulür, OKM

OFFICE OF THE LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614, Dist. Mokokchung : Nagaland

TENÜNGSANG AGÜTSÜR

Langpangkong Kaketshir Mungdang (LKM) ajanga taküm küm NBSE ajanga agiba HSLC aser HSSLC tatidang nung Langpangkong nunger kaketshirtem kwikati takok tajung ngutetogo nenok ajak nem tenüngsang agütsür. Talisa ano item teküboklen agüja aliba kaketshirtemi ajak dang nungi alia takok aser konang nungsang tulu kaketshir mungdang nem bener arutsü nung tenüngsang tulu agütsür.

- Kr. Yimyatella Longkumer** (Changtongya) D/O Wb. B. Tiameren i HSLC tatidang nung Holy Cross Hr. Sec. School, Dimapur nungi Top 3rd jenjang nung takok angu.
- Sp. Yangertemjen** (Yaongyimsen) S/O Wb. Lt. Limaonen i Saint Savio School, Chumukedima nungi HSLC tatidang nung Top 4th buba jenjang nung takok angu.
- Kr. Longtila Jamir** (Changtongya) D/O Wb. N. Chuba Jamir i Model Hr. Sec. School, Kohima nungi HSLC tatidang nung Top 10th buba jenjang nung takok angu.
- Kr. Sentienla Yaden** (Merangkong) D/O Wb. Temjenzulu Yaden i The Vineyard School, Kohima nungi HSLC tatidang nung Top 11th buba jenjang nung takok angu.
- Kr. Yashijungla** (Changtongya) D/O Wb. Lt. Lemdongnukshi i Christian Standard Hr. Sec. School, Changtongya Town nung HSLC tatidang nung Top 16th buba jenjang nung takok angu.

Kaketshir Mungdangi takok angur kaketshirtem ajak tarutsü anogotem nung parnok azüngba wadang balala nung takok ngujang ta sarasadema moatsür. Langpangkong Kaketshir wadang nung.

Sd/-
Washimong Sadem Longkumer
Tir, LKM

Sd/-
Temjentoshi Jamir
Tongti Zulur, LKM

AO KAKETSHIR TELONGJEM

(Ao Students' Union)
GUWAHATI, ASSAM
Limuk Asoshi (For the Nation)

Ao kaketshir Telongjem Guwahati office ajanga kaketshir shirnokisa Under Graduate, HSLC/HSSLC tatidang nung takok tajung angu, nenok ajak dang tepelaba lemsateper.

Covid-19 ajanga shisaluyimertemi admission maparen nung mapaitoktetba tetsükdaksü ajurutsü ajiteta Ao Kaketshir Telongjem Guwahati nung lenirtemi college balala nung admission bushirtem yariteptsü atema item numbertem nung tongteprateptsü agütsür.

- Don Bosco University : Imlikokla - 7005051156
- Assam Downtown University : T. Imyariba Pongener - 8837361413
- Royal Global University : Sentiyangla Jamir - 8837265883
- Girijonanda Chowdhury Group of Institute : Tzutiyong Jamir - 8837058239
- USTM/RIST/MGU : Suneper Aier - 8258096018
- Cotton College : Onenchila - 9612770190
- JB Law College : Akumtola - 8794247848
- NEF Law College : Watitemjen Jamir - 9862190748

For other colleges and University contact : Moakum Imchen 9366293507

Regards

Sd/-
Temsunungsang Pongener
President, AKTG
7005858870

Sd/-
Watitemjen jamir
General Secretary, AKTG
9862190748

Tokyo Olympics nung China tsür Yang-i mezüing gold medal kokogo



Tokyo, Chiteni/July 24, 2021: Tetsür 10m air rifle final asayar sülen medal agütsüba sabang nung gold medal takok angur China tsür Yang Qian (tiyong) den Russia tsür Anastasiia Galashina (abilen) aser Switzerland tsür Nina Christen na külemi tangokba noksa ka yangi angur. Iba asaya nung Anastasiia silver medal aser Christen-i bronze medal nguogo.

Tokyo, Chiteni/July 24, 2021

(Agencies): Honibarnü, tetsür 10m air rifle final asaya nung, China tsür shooter Yang Qian-i Russia tsür Anastasiia Galashina madak takok ngua, lai Tokyo Olympics indang mezüing gold medal kokogo.

Tetsür 10m air rifle final tetoktepba nung, Yang-i point 251.8 agi Russia tsür Anastasiia Galashina (251.1) aser Switzerland tsür Nina Christen (230.6) tsükdakja gold medal takok anguba den lai ostüsütsüsa Olympic record

tasen yanglua liasü.

Iba asaya tatembuba round nung Galashina-i takok angutsü ama asadangteta liasü, saka lai point 8.9 dang anguba ajanga Yang-i la ajateta asayatsü maongka angu.

Terepranger ishika matsüandang Tokyo Olympics lapokba sentong agir sülen, tetoktepba indang mezüing sempet agütsüba sentong nung, International Olympic Committee president Thomas Bach-i Yang nem gold medal agüja liasü.

Iba Games nung renemba

ama, Covid-19 tetuyuba nung anidaka, Bach-i tray ka nung iba medal bener arutsü aser Yang-i tray nungi iba medal agizüka la tekong nung inok.

Asaya tesemtem nung fans nokdang asünung, Yang-i iba asaya takok ngur sülen, külem China nung staff temi la nem tenüngsang agütsü.

Christen-i Norway tsür Jeanette Hegg Duestad ajateta lai Bronze medal takok angu. Qualifying round sülen, Christen-i Jeanette tejakdang ser asaya.

Tokyo Olympics: Mirabai-i India atema mezüing medal angu

Tokyo, Chiteni/July 24, 2021

(Agencies): Honibarnü, Tokyo Olympics tetsür 49kg weightlifting asayamung nung, India atema Mirabai Chanu-i mezüing medal koka otsü yangluogo. Iba tetoktepba nung, Mirabai Chanu-i silver medal takok angu.

Karnam Malleswari-i taoba Olympic weightlifting asayamung nung medal takok anguba sülen, medal takok angur India tsür weightlifter rongnung Chanu tanabuba kümogo.

2000 Sydney Olympics nung Malleswari-i bronze medal takok angu aser iba mapang medal takok angur India tetsür weightlifter rongnung la mezüing aküm.

Tetsür weightlifting 49kg category tetoktepba nung, Chanu-i 'snatch' nung 87 kg aser 'clean and jerk' nung 115 kg densema lai 202 kg ajungketa tanabuba jenjang ajangzüktet. Chanu-i mezüing 84 kg aser 87 kg ajungketet, saka tasembuba nung lai 89 kg majungketet.

Clean and jerk nunga Chanu-i 110 kg sülen 115 kg ajungketet. Ajisüaka, final nung lai 117 kg majungketet.

Table Tennis :

Honibarnü, tetsür kija table tennis asaya nung, India tsür Manika Batra aser World No. 98 Sutirtha Mukherjee nati pei pei tata asaya koker sülen, tanabuba round-i iogo.

Batra-i Great Britain tsür Tin-Tin Ho madak 4-0 (11-7, 11-6, 12-10, 11-9) agi takok.

Sutirtha Mukherjee-i 11-5, 9-



Tokyo, Chiteni/July 24, 2021: 2020 Summer Olympics - women's 49kg weightlifting asayamung nung, India tsür Chanu Saikhom Mirabai-i silver medal koker sülen tangokba noksa ka yangi angur.

11, 13-11, 11-9, 3-11, 9-11, 5-11 agi Sweden tsür Linda Bergström tsükdaktsü.

Deobarnü (25.07.2021) Manika Batra-i Ukraine tsür Margaryta Pesotska den tanabuba round asayatsü.

Tetsür kija TT masayadang, arishi küm 26 Batra-i külem India nung Achanta Sharath Kamal den longjemer temeyoktep tarep nung asaya liasü. Ajisüaka, Round of 16 nung, Batra aser Sharath nati World No. 1 temeyoktep tarep - Lin Yun Ju aser Cheng I Ching na makok.

Badminton :

Tebur Badminton group A asaya nung, India nung tarep Satwiksairaj Rankireddy aser Chirag Shetty nati Chinese Taipei nung tarep aser world no. 3 Yang Lee aser Chi-Lin Wang madak takok nguogo.

Iba asaya nung, world no. 10 tarep Chirag aser Satwik nati 21-16 16-21 27-25 agi Lee aser

Wang tsükdaktsü. Taküm küm tetenzüklen, Lee aser Wang nati Yonex Thailand Open, Toyota Thailand Open aser BWF World Tour Finals title koka lir.

Tebur kija Group D asaya nung, seed 13buba B Sai Praneeth-i 17-21 15-21 agi Israel nung Misha Zilberman makok.

2019 World Championship nung bronze medal takok angusang Praneeth-i tanabuba round nung Netherlands nung Mark Caljouw den asayatsü.

Tennis :

Tennis asayamung tebur kija mezüing round asaya nung, India nung Sumit Nagal-i Uzbekistan nung Denis Istomin madak 6-4, 6-7 (6), 6-4 agi kokogo.

Tanabuba round nung, Nagal-i Russia nung Daniil Medvedev den asayatsü. Mezüing round asaya tanga ka nung, Australian Open runner-up Daniil-i Kazakhstan nung Alexander Bublik madak 6-4 7-6(8) agi takok angu.

Judo :

Nippon Budokan kübok Tokyo 2020 Olympics - Women's 48kg elimination round of 32 nung India tsür Shushila Devi Likmabam-i Hungary tsür Eva Csernoviczki makok.

Tokyo Games nung India nungi Judo asayar rongnung Sushila dang lir. Tetsür Elimination round asayaba mapang, 2012 bronze medal takok angula, Eva Csernoviczki-i 10-0 agi Sushila Devi-i tsükdaktsü

India-i goal 3-2 agi New Zealand kokogo

Tokyo, Chiteni/July 24, 2021 (Agencies): Honibarnü, Tokyo Olympics - tebur Hockey asaya nung India team-i New Zealand kokogo. Captain Manpreet Singh-i aniba team-i Kiwis madak goal 3-2 agi takok angu. India atema Rupinder Pal Singh-i goal ka (1) aser Harmanpreet Singh-i goal ana (2) idaktsü.

Iba asaya tenzüker sülen, New Zealand puri mezüing goal idakja parnok 1-0 agi tejakdang ser asaya. Ajisüaka, India-i penalty corner ka anguba sülen, Rupinder Pal-i goal ka idakja telok anaprongla goal 1-1 kümadak.

Tanabuba quarter' nung Rupinder Pal-i penalty corner ka Harmanpreet Singh nokdaka alileni yok aser pai New Zealand goalkeeper Leon Hayward adena goal idaktsüba sülen, India pur goal 2-1 agi Kiwis tejakdang ser asaya.

India-i goal tanabuba meinoktsüandang, Vivek Sagar Prasad-i New Zealand defence adena ball bener metutetba yong, pai goal ka idaktsütsü maongka tajung magitet. Harmanpreet-i ano penalty corner ka ajanga goal tanabuba idaktsüba sülen, India-i 3-1 agi New Zealand ajatetadok.

India-i goal tasembuba idaktsür sülen mapang tatsüka lir minute 36buba nung, penalty corner ka nung Harmanpreet-i Olympic hat-trick atema maongka angu, saka pai zülöktsütsüba ball Hayward-i

nokdanga liasü.

Tasembuba quarter tatemlen, New Zealand atema Stephen Jenness-i goal tanabuba idaktsü.

Iba asaya atemtsü mapang ishika dang lia New Zealand-i ano goal idaktsütsü merandang, saka India defence aser goalkeeper PR Sreejesh nungeri world no.8 team - New Zealand nem maongka magütsü.

Tokyo Olympics nung India aser New Zealand team anaprongla Australia, Argentina, Spain aser Japan den Group A nung dena lir.

Tebur asaya tanga ka nung, Australia aser Japan na asaya liasü. World no. 1 Australia-i goal 5-3 agi asayamung ayonger telok - Japan kokogo.

Maneni, kasa anogo, tetsür hockey asayamung nung India tetsür hockey team-i 1-5 agi Netherlands makok. Mezüing quarter ana tashi India tetsür team-i kanga meranga asaya, saka world no. 1 Netherlands parnok amokbanga asaya.

Iba asaya nung, Netherlands atema Felice Albers-i minute 6buba aser 43buba nung goal ana idaktsü. Kasa mapang, Margot van Geffen (33rd minute), Frederique Matla (45th) aser Caia Jacqueline van Maasakker (52nd) nungeri külem telok atema goal ka ka idakja liasü.

India atema, captain Rani Rampal-i minute 10buba nung goal ka idaktsü

Saha aser Easwaran na India squad nung denogo



Durham, Chiteni/July 24, 2021

(Agencies): Wicket-keeper-batsman Wriddhiman Saha, bowling coach Bharat Arun aser standby opener Abhimanyu Easwaran nung quarantine' temer sülen, England den taruba Test series atema, par asempronlga Durham kübok India camp nung denogo.

Board of Control for Cricket in India (BCCI)-i Twitter ajanga par asem team India indang Bio-Bubble' nung adenba osang metetdakja liasü.

"Team India bowling coach B. Arun, Wriddhiman Saha aser Abhimanyu Easwaran nung Durham nung külem team pur den denogo," ta BCCI-i par asem practice asüba mapang

tangokba noksa den külemi iba olen lemsatep.

Wicketkeeper-batsman Rishabh Pant aser throwdown specialist Dayanand Garani den ajurutepta ajanga Saha, Easwaran aser Bharat Arun nung anogo 10 tashi quarantine asü. Pant aser Garani naprongla dak Covid-19 puteta liasü. July 8 nü Pant dak COVID positive putet aser July 14 nü , Garani dak iba tashidak putetba osang jangjatsü.

Pant iba wara nungi taneptsü ngur lir aser July 18 nü pa quarantine nungi adok. Iba sülen, Team India's bio-bubble nung madandang, pai anaben tashi COVID-19 tendang. Pant-i July 22 nü India squad nung denogo.

BILEMDANGANG

"Tanü aika jembirji asüing olangjem agütsütsü makatsü."